



ФЕЙЗ ве РУХАНИЕТ ИКЛИМИНДЕ

Ҳаджы Мебрур ве Умре

Осман Нурий ТОПБАШ







WORLD GRAPHICS

Адрес: Bulgurlu Mah. Çiçek Sok. No:35
Küçük Çamlıca, Üsküdar, Стамбул / Тюркие
rasimizm81@hotmail.com - www.hudayiworldpress.com
Тел: (+90 216) 428 49 36 Факс: (+90 216) 428 49 36

Дизайн: Расим Шакиров

Хаджы Мебрур
бе
Умре

СЁЗ БАШЫ

Бизлерни иман лютфюне ляйыкъ корип, иман-нынъ къуванчы олгъан ибадетлер иле кендисине къавушмакъ ёлларыны ачкъан Аллаһкъа сонъсуз хамд ве сеналар олсун!

Аллаһкъа къавушмакъ ёлунда энъ гузель къуллукъ ичюн бутюн инсанлыкъкъа мисильсиз бир орьнек ве ребер олгъан Варлык Нуру, Пейгъамберимиз, Шефаатчымыз, Эфендимиз -саллаллаху алейхи ве селлем-ге сонъсуз саят ве селям олсун!

Инсан огълунынъ маддий ве маневий, битмез-тюкенмез ихтияджлары бар. Буларнынъ базылары, аят киби зарурдыр. Меселя, беденнинъ яшамасы ичюн ава, сув ве аш керек. Рухнынъ да пек муим ихтияджлары бар. Атта булар бедений ихтияджлардан даа муимдир. Чюнки тен - топракъ ёлджусы, рух исе сонъсузлыкъ ёлджусыдыр.

Бу себепнен Аллаһ:

«Коклерде де рызкъынъыз ве сизге ваде этильген башкъа шейлер бар.» (эз-Зарият, 22) деп буюра. Яни инсаннынъ маневий гъядасына ишарет этип, гонъюллернинъ къуртулыш сермиясы ибадетлер олгъаныны бильдирмекте. Бунынъ ичюн бутюн ибадетлер, Аллаһ тарафындан эмир этильген олса да, аслында инсаннынъ энъ вазгечильмез маневий ихтияджыдыр. Ойле бир ихтиядж ки - рух ве гонъюль, ибадетлерден аладжагъы кучъни, башка ич бир шейден аламаз. Бугунъ бу керчекни



анъламагъан инсанлар, озъ рухларынынъ джан чекиш-кенини сейир этмектелер. Анджакъ гонъюль гыдасыны алгъан бахтияр инсанлар исе, бам-башкъа бир аэнк ве бахт ичинде, изтирапларны ве джефаларны дахи сефагъа чевирип, аятларыны ашкъ ве догъру ёл узъре кечирелер. Чюнки инсаннынъ ибадетлерден алгъан маневий зевкъ ве иляхий фейиз, дюньянынъ къапкъанлары ичине тюш-месине мани олур.

Бойледже, эм инсаннынъ гонъюль ихтияджыны коръмек ичюн, эм де сонъсуз ниметлерге къаршы шукюр этмеси макъсадынен базы ибадетлер фарз къылынды. Тыпкъы бир докторнынъ, хастасына, мытлакъ къулла-масы керек олгъан иляджларны язмасы ве буны шифа ичюн шарт къошмасы киби. Чюнки инсанлар я тембел-ликлеринден, я да меселенинъ эмиетини анъламагъанлары ичюн, ибадет ихтияджларына къайдсыз къала билелер. Бунынъ ичюн Аллаһ, къуллаарына рухларынынъ энъ муим ихтияджы олгъан ибадетлерни фарз къыларакъ, оларны сонъсуз махрумиеттен, гъафлеттен къуртармакъ-ны мурад эте.

Ич шубесиз, бу муим ибадетлернинъ башында намаз кельмекте. Бунынъ ичюн башта **намаз** эмир этильди. Чюнки кереги киби къылынган намаз, къальпдеки перделерни котере. Бойледже, **«Намаз, муминнинъ мирад-жыдыр»** акъикъаты ортагъа чыкъа ве инсан Аллаһкъа мирадж этип, онъа къавушаджакъ. Бу къавушув, анджакъ Аллаһнынъ **«Седже эт ве якълаш!»** (эль-Алякъ, 19) эмри-не уяракъ мумкюндир.

Намаз ибадетинден сонъ, рухларымызгъа гыда берген башкъа бир фарз ибадети **«Ораза»**дыр. Ораза - са-быр, ираде ве нефсаний арзуларны тербиелемекнен ах-лякъны гузеллештирмеге ярдым эткен буюк бир ибадет-тир. Ораза, инсангъа Аллаһнынъ берген ниметлернинъ къадрини хатырлатыр. Арамызда яшагъан ач ве факъир-лернинъ алларыны тюшюнге ярдым этер. Барлыкълы кимселерге, ач ве факъир инсанларнынъ махрумиетини таттырып, оларны бу мевзуда бир тутар. Бойледже, зен-



гин инсанларнынъ мерхамет ве ярдым этме истидатларыны кучьлендирир.

Ислям дининде, ичтимаий низамда факъир иле зенгин арасында сайгъы ве севги багъларыны къурмакъ, пахыллыкъ ве душманлыкъны ёкъ этмек ичюн эмир этильген башкъа бир фарз ибадети де **«Зекят ве Инфакъ»** тыр. Бу ибадет, барлыкълы инсанларны мал ве мулкке къул олмакътан къуртарыр, мухтаджларны да зенгинлерге къаршы янълыш арекет ве тюшюнджелерден везгечирир, бойледже ичтимаий мусавийлик къорчаланыр.

Бу ибадетлернинъ янында эм малий, эм де бедений фарз ибадети - **«Хадж»** дыр. **Хадж** - иманны пекиштирир ве махшернинъ бир бенъзерини бу дюньяда яшатыр; **«Ольмеден эвель олюнъиз!»** сёзюнинъ манасыны анъламагъа ярдым эткен ибадеттир.

Хаджнынъ маневий тарафы, корюльген джеэтинден даа чокъ эмиетлидир. Азрети Пейгъамбер -саллаллаху алейхи ве селлем-нинъ «хаджы мебрур» ифадеси иле къаст эткени хадж, маневий гузеллик ве руханиетнен толу олгъан бир ибадеттир. Бу джеэттен хадж - дуа, теббе ве истигъфар иле гонъюльнинъ иляхий рахмет, берекет ве фазилетлерге наиль олмасыдыр. Яшайышнынъ гузель ишлернен донатылмасыдыр. **Хадждан сонъра да бу гузель алнынъ девамы ичюн Аллаһкъа сёз берильмесидир.**

Аллаһ Расули -саллаллаху алейхи ве селлем-, хадж ве умре эснасында япылгъан гузель ишлернен барылгъан нетиджени ифаде эткенде, бу мубарек ибадетлердеки макъсатны шойле беян буюрды:

«Хаджнен умренинъ арасыны бирлештиринъ. Чюн-ки булар гунахны, тыпкъы кёрюкнинъ демирдеки тотны темизлемеси киби темизлер.» (Несаи, Меназик, 6; Ибн-и Мадже, Меназик, 3)

Бойле бир маневий арынмагъа, янъыланмагъа ве та-зеленмеге весиле олгъан ве хадис-и шерифте «хадж иле арасынынъ бирлештирильмеси» тевсие этильген **«умре»** ибадети де чокъ муимдир.



Сенедє бир кере олгъан ве белли кунълерде еринє кетирильген хадж ибадетинден башкъа, йылнынъ эр анги бир вакътында ве истенильгени къадар япылмасы мумкюн олгъан «умре», пек фазилетли олгъаны ичюн «кучюк хадж» оларакъ табир этилир. Бу ибадетнинъ фазилетини де эйи анъламакъ керек.

Бутюн бу ибадетлерде энъ чокъ дикъкъат этиледжек хусус, **къальб-и селим** ве **ихляс** иле япылмасыдыр. Эгер къуллугъымызнынъ Аллаһ къатында макъбул олмасыны арзу этсек, бутюн гъайрет ве ибадетлеримиз ашкъ ве эдеп ичерисинде олмалы. Анджакъ бу шекильде олса, ибадетлеримиз «амели салих» сыфатыны къазаныр ве эбедий алемде бизим ичюн сеадет азыгъымыз олур.

Бу эсеримизде, хадж ве умре ибадетлерининъ къальбий джеэтини ве такъва¹ ольчулери ичинде эдеб иле япылуw шеклини ифаде этмеге чалыштыкъ. Даа эвель эсерлеримизде я да макъалелеримизде яйынлангъан мевзу иле алякъалы языларымызны козьден кечирип, янъыдан сыныфландырдыкъ. Бойледже, хадж ве умренинъ къальбий джеэти акъкъында къыскъа ве топлу бильгилерни дин къардашларымызнынъ дикъкъатларына авале эттик.


Аллаһ, бутюн ибадетлеримизни даима ихляс ве такъванен ерине кетирмемизни бизлерге насип буюрсын! Ахирет ёлджулыгъымызда; намазымызны эбедий ёлдашымыз, оразамызны эбедий достумыз, зекят ве садакъаларымызны сонъсузлыкъ ашымыз ве хаджымызны да энъ макъбул гонъюльдешимиз ёйлесин! Ибадетлеримизнинъ эр бирини Аллаһкъа ляйыкъ олмасыны джюмлемизге насип ёйле!

Амин!

Осман Нури ТОПБАШ
Август 2006
Ускюдар

1 **Такъва** – Аллаһтан къоркмакъ ве бунынъ нетиджесинде диннинъ ясакълагъаны хусуслардан къачынмакъ.







ХАДЖЫ МЕБРУР ВЕ УМРЕ

Усламнынъ беш темель эсасындан бири олгъан **хадж** - эм малий, эм де бедений бир ибадеттир. Буюк фазилетлерле толу олгъан бу ибадетнинъ лайыгынен ерине кетирильмеси, юксек къальп олгъунлыгъы кямил бир иман ве ирфангъа багълы.

Хадж - Пейгъамберлернинъ биринджиси Адем - алейхисселям-дан Ахирзаман Небисине къадар девам эткен бир ибадеттир. Даа бу алемде махшернинъ бир бенъзерини яшатып, «*Ольмеден эвель олюнъиз!*» сырыннынъ акъикъатына иришмемизге весиле олмакъта.

Азрети Адем ве Азрети Ава иле башлагъан инсанлыкъ къорантасы, динлерини бахт ве сеадет ичинде яшамакъ узьре, ильк ибадетхане оларакъ Меккедеки Кябенинъ ерини сайладылар. Адем огъуллары, денъишкен яшайыш ве ичтимаий шартлар себебинен башкъа ерлерге яйылдылар. Асырлар кечти, несиллер денъишти, инсанлар акъикъый динден дёндилер. Бойледже, бир муддет сонъра бу мукъаддес ибадетхане гъайып олды. Азрети Ибрахим -алейхисселям- Аллаһнынъ эмринен оны текрар къурды ве о ерлернинъ берекетленмеси ичюн дуа этти. Аллаһ буны Къуран-ы Керимде шойле беян эте:

«**Хатырла ки, Ибрахим бойле деген эди: «Раббим.**



рымны путларгъа табынувдан узакъ тут». «Чюнки, олар (путлар) инсанлардан бир чокъуны саптырдылар. Раббим, ким манъа уйса, о мендендир. Ким де манъа къаршы кельсе, артыкъ сен акъикъатен чокъ багъышлайыджысынъ, пек мерхаметлисинъ».

«Эй, Раббимиз! Эй, саибмиз! Намазны дос-догъру къылмалары ичюн мен неслимден бир къысмыны сенинъ Бейт-и Харамынънынъ (Кябенинъ) янында, зираат япылмагъан бир вадийге ерлештирдим. Сен, эй Раббим, инсанлардан бир къысмынынъ гонъюллерини оларгъа мейль эттир ве мейвалардан буларгъа рызыкъ бер. Умют этилир ки, бу ниметлерге шукюр этерлер». (Ибрахим, 35-37)

Хадж ибадети Исламдан эвель де бар эди. Анджакъ мушриклер, оны ибадет олмакътан чыкарып, кучлю ве къуветли кимселерге адангъан ахлякъсыз бир мерасим алына кетирген эдилер. Бойледже, араплар арасында имтияз саиби олгъан Къурейш къабилеси, Кябени урбаларыны кийип таваф² эте эдилер, факъат дигер арап къабилелери - къадын-эркек эписи, чыр-чыплакъ бир шекильде тавафларыны япа эдилер. Урбаларыны чыкъаргъан бу чыплакъ инсанларнынъ айып ерлерини ортымелери, Къурейшнинъ джумертлигине багълы эди. Яни Къурейшлилер урба берсе ортюнип, бермесе чыплакъ алда таваф эте эдилер. Къурбан кескенлери вакъыт къанны Кябенинъ къапы ве диварларына сюртер, къурбан этини де якъа эдилер.

Ниает, сеадет асры кельди ве Пейгъамбер Эфендимиз Азрети Мухаммед Мустафа -саллаллаху алейхи ве селлем- иле дин ильк башлагъан ерде, сонъ бир кемал косътерип, бутюн бу айып адет ве хурафелерни ортадан ёкъ этти. Зира Ислямда эр ибадетнинъ гъаеси, Аллахны анъмакъ ве Ондан магъфирет тилемектир.

2 **Таваф** – Кябенинъ этрафында дёнмек. Хадж ибадетининъ шарты.



Пейгъамбер Эфендимиз -саллаллаху алейхи ве селлем- Мекке ве Медине шеэрлеринде сеадет асры яшады ве яшатты. Бойледже, о шеэрлер къыяметке къадар Исламнынъ ве мусульманларнынъ меркези олгъан мубарек ерлер олдылар.



Бу мубарек топракълар Азрети Адемден башлап, кунюмизге къадар иманлы юреклернинъ руханиетлеринен зенгинлешип, Аллахны севген инсанларнынъ козяшларынен сувлангъандыр. Акъикъатны арагъан, гонъюльнен хадж япкъан инсан, о мекянларда бир чокъ Пейгъамбернинъ маневий излерини арап ве оларнынъ хатыраларындан феиз алып. Чюнки бу мукъаддес ерлер, эксериет пейгъамберлернинъ азиз хатыралары иле толуп. О ерлерде Аллахнынъ рахмет, магъфирет ве берекети акъылгъа келир.

Бу джеэттен, хаджнынъ башкъа бир гъайеси, Раббимизнинъ о мубарек ерлердеки ишаретлерини юджельтемек ве урьмет косьтермек, о мукъаддес макъамларнынъ хатырасы иле гонъюллерни феизлендирмектир.

Хадж ве умре ниетинен о мубарек топракъларгъа аякъ баскъанлар, Ибрахим -алейхисселям-нынъ:

«Я Раб! Гунахларымызны багъышла, афф эт! Сен энъ буюк Рахман ве Рахим Аллахсынъ. Я Раб! Эвлядымы да меним ёлума, меним диниме таби эт!» дуасына ортакъ олып, бу дуалардаки феиз ве берекетни корерлер.

Бу сайысыз нимет ве гузелликлер, мумин гонъюллерни о мубарек мекянларгъа асретлик ве сагъынув ислеринен багълагъандыр. Бу ерлерге асрет олгъан нидже ашыкъ гонъюллер де шу сёзлернен о ерлерни анъарлар:

*Коръмез олдым ыракъ иле якъыны,
Гузель Кябетуллах барайым сангъа!*

я да:

*Эй бад-ы саба, огърарса ёлунъ семт-и Харамейн'е
Селямымны арз эйле Расулу'с-Секалейн'е!..*



Яни «Эй сабах рузгяры! Эгер Мекке ве Мединеге ёлунъ тюшсе, о ерлерге ве хусусан инсанлар ве джинлернинъ Пейгъамбери Азрети Мухаммед Мустафагъа селямларымы сёйле!» ифаделеринен о мубарек ерлерге ве Алемлернинъ Эфендисине муаббет толу селямлар ёлларлар.

Бу севги гонъюллерде о къадар теренлешти ки, мукъаддес топракъларгъа кеткенлерни дуа ве селямларнен огъурламакъ адет олгъандыр. Хаджгъа кеткенлернинъ къулакъларына бир фысылты оларакъ сёйленген ашкъ ве муаббет толу гонъюль истеклерини, шаир шойле ифаде этер:

*Кечкенинъиз ёлларгъа,
Бизден селям алып барынъ!
Хакъ дост олгъан къулларгъа,
Бизден(селям) алып барынъ!..*

*Барынъ хаджны япмагъа,
Эринъ сонъсуз сафагъа,
Мухаммед Мустафагъа
Бизден селям алып барынъ!..*

*Мекке иле Медине,
Эки эшсиз хазине,
Чихар яр-и гюзине,
Бизден селям алып барынъ!*

*«Леббейк» деп боюна,
Чапынъ «земзем» сувуна,
Хашим огъуллары союна,
Бизден селям алып барынъ!*

*Кирсенъиз (гер)«ихрамгъа»,
Эль сюрмеден харамгъа.
Сахабе-и кирамгъа,
Бизден селям алып барынъ!..*





*Ялварып Раббимизге,
Дуалар этинъ бизге,
Юдже Кябемизге,
Бизден селям алып барынъ!*

*Кеткенлер ашкъ багъына,
Тюшмез гъафлет агъына,
О гузель Нур Дагъына,
Бизден селям алып барынъ!..*

*Кирип къальби Хатимге,
Седжде этинъ Рахимге,
Макъамы Ибрахимге,
Бизден селям алып барынъ!..*

*Хакътан кельген берата,
Ачылгъан эр къанаткъа,
Мина ве Арафаткъа,
Бизден селям алып барынъ!..*

*«Дженнетуль Бакъи»мизге,
«Гульшени пак»имизге,
Шол «ферах-нак»имизге,
Бизден селям алып барынъ!..*

Эвельден берли бу ашкъ ве муаббетнинъ ичинде
яшап, гонъюллерини раат этип оламагъан нидже Аллах
къуллары, о рахмет мемлекетине сыгъындылар ве намаз-
ларыны о ерлерде къылдылар.

Атта, о ерлерге кетип оламагъан нидже факъир
ашыкъларны бу лютфтен насиптар этмеге тырыштылар.
Бу себепнен Азиз Махмуд Худайи азретлерининъ къанат
ачмасына да бойле бир вакъиа весиле олгъан эди:



Бурса къадысы олгъаны йылларда Худайи азретлерине меракълы бир дава келир. Бир къадын, къоджасыны шу сёзлернен шикъетлер:

«—Къады эфенди! Къоджам эр сене хаджгъа кетмеге ниет этер, факъат факъир олгъаны ичюн бир тюрюл имкъан тапып кеталмаз. Бу сене де хаджгъа кетип олмайджам деп туттурды. Атта: «—Эгер бу сене хаджгъа кеталмасам, сенден айырыладжам!» деди. Даа сонъра къурбан байрамына аз бир вакъыт къалгъанда орталыкътан ёкъ олды. Беш алты кунъ сонъра да пейда олып, хаджгъа барып кельгенини сёйледі. Ич бойле бир шей олурмы? Къады эфенди! Артыкъ бу яланджы адамдан айрылмакъ истейим!..»

Къады Махмуд эфенди къадыннынъ коджасыны чагъыртып, онъа ханымынынъ айткъанлары догъру олып олмагъаныны сорар. Адам:

«—Къады эфенди! Ханым догъру сёйледі, ама мен сёйлегенлерим де догъру. Шуны билинъ ки, мен керчектен хаджгъа барып кельдим. Атта о мубарек топракъларда Бурсадан кельген хаджыларнен де корюштим ве кетирмелери ичюн базы эдиелер быракътым», - дер.

Къады Махмуд эфенди шашкъынлыкъ ичинде:

«—Бу насыл олур, эфенди?!» - деп сорай. Адам анълатмагъа башлар:

«—Эфендим, эр сене олгъаны киби бу сене де хаджгъа кетемедим, буюк бир кедернен **Эскиджи Мехмед Дедеге** кеттим. О да, мени элимден тутып, козьлеримни къапатмамы сёйледі. Козюмни ачкъаным заман Кябеде эдим!..», - дер.

Бойле бир шейге ильк дефа шаат олгъан къады эфенди, бунынъ мумкюн оламайджагъыны сёйлеп, о адамнынъ сёзюне инанмаз.

Бунынъ узерине адам, саде, факъат тюшюндириджи бир джевап берир:

«—Къады эфенди! Аллах Таалаянынъ душманы шейтан, бир анъда бутюн дюньяны айлана да, Аллах



досту темиз бир кѳул, не ичюн бир аньда Кябеге кетип оламасын?!».

Кѳады Махмуд эфенди бу кѳарарны Бурсалы хаджыларнынъ кѳайтып кельмелерине быракъыр. Бурсалы хаджылар кѳайткъанда да япкъан тахкъикъат нетидже-синде меселени огренир ве буюк бир айрет ве шашкъын-лыкъ ичинде даваны токътатмакъ меѳбуретинде кѳа-лыр. Факъат юрегине бир кѳор тюшер. Артындан Эски-джи Деде весилесинен Уфтаде азретлерининъ маневий алкъасына кѳатылыр, ве джихан кѳутубы бир гонъюль султаны олуp.



Эльбетте о мубарек топракъларгѳа дуюлгъан ас-ретлик, ялынъыз кѳумлу чѳллерни сейир этмеге дуюл-гъан асретлик дегильдир. О ерге барманынъ макъсады Ибрахим -алейхисселям-нынъ макъамыны, Исмаил -алейхисселям- ве эвлядынынъ ватаныны зиярет этмек-тиp. Расулуллах -саллаллаху алейхи ве селлем-нинъ до-гъып оськен, Ислямны яймагѳа башлагъан топракълар-ны коръмек, О юдже Пейгѳамбернинъ алгъан аваны акъ джигерлеримизге ве гонъюллеримизге толдурмакъ гѳае-си иле олмалы. Хакъ досту бир шаир не гузель сѳйлер:

«Баштан ашагѳа не ерге козь кездирсем, сайысыз муджизе, кѳальпнинъ этегине япышып: «Иште асыл ме-кян бу ер!» дер.»

Бу ифаделер, ялынъыз шаирнинъ ислери дегиль, айны заманда иляхий бир акъикъаттыр. Аллах буюрыр:

فِيهِ آيَاتٌ بَيِّنَاتٌ

« О ерге ап-ачыкъ нишанелер бар...» (Ал-и Имран, 97)

Бойледже, бу мукъаддес ерлерде козьлердеки пер-делер ачылыр, гонъюль козьлеринен этрафына бакъкъан-ларнынъ иман деръялары джошар, ашкъ ве иляхий муаб-бет инсаннынъ эр тарафыны сарар. Не ерге бакъсалар,



юдже бир лезет ве джошкъунлыкъ дуярлар; бойледже козьлерден яшлар келир, тиллер Аллахны анъмакъ ве юджельтмекнен мешгъуль олур. О мубарек ерлерде бутюн вакъытларыны юксек бир эдеп ве урьмет алы ичинде кечирирлер. Бу да, ает-и керимеде шойле буюрыла:

ذٰلِكَ وَمَنْ يُعِظْكُمْ شَعَائِرَ اللّٰهِ فَاِنَّهَا مِنْ تَقْوٰى الْقُلُوْبِ

«Эр ким Аллахнынъ нишанелерине сайгъы косьтерир исе, шубесиз, бу, къальплернинъ такъва-сындандыр.» (эль-Хадж, 32).

Бу тарафтан бакъсакъ, хадж - сырф маддий бир ибадет дегиль. Онынъ маневий джеэти, корюльген джеэттен даа муимдир. Азрети Пейгъамбер -саллаллаху алейхи ве селлем-нинъ «хаджы мебрур» ифадесинен къаст эткени хадж, бойле маневий гузелликлернен донатылгъан хадж-дыр.

Бу джеэтинен хаджнынъ макъсады, дуаларнен, теvбе ве истигъфарнен инсан гонъюлини иляхий рахмет, берекет ве фазилетке къавуштырмакътыр. Яшайышнынъ гузель амеллернен донатылмасыдыр. **Хадж биткен сонъ да бу алнынъ девам этеджеги акъкъында Аллахкъа сёз берильмесидир.**

Азрети Ибрахим -алейхисселям-нынъ шу дуасы не гузельдыр:

«Эй, Раббимиз! Бизни санъа бойсунгъанлардан эйле, неслимизден де санъа итаат эткен бир уммет чыкъар, бизге ибадет усулларымызны косьтер, теvбемизни къабул эт; зира, теvбелерни чокъча къабул этиджи, чокъ мерхаметли ялынъыз Сенсинъ!» (эль-Бакара, 128)

Хадж япмагъа ниетленген ашыкъ гонъюллер, бир тарафтан Ибрахим -алейхисселям-нынъ бу дуасыны тюшюнирлер, дигер тарафтан да Хареми Шерифнинъ³

3 Харем-и Шериф – Кябе ве дживары.



ичинде ве Мекке сокъакъларында Пейгъамбер -саллаллаху алейхи ве селлем-нинъ юргенини ве яшагъаныны тюшюнирлер. Бельки Онынъ мубарек аякъларынынъ излери усьтюнде тургъаныны хаял этип, о излерге джан гонъюльден юз сюртмекнинъ эджаныны дуйып, Ондан кунюмизге накъыл этильген нидже хатыраларнен толурлар.

Меселя, Сафа тепесинде Азрети Пейгъамбер -саллаллаху алейхи ве селлем-нинъ Мекке мушриклерине хитап этмесини тюшюнип, о кунълерни козылеринде джанландырырлар. Тюшюнирлер ки, о Алемлернинъ Эфендиси, бу тепеден Меккелилерге Эбу Къубейс Дагъыны косьтерип шойле буюргъан эди:

«Сизге; «Шу дагънынъ аркъасында душман бар, бу ерге догъру якълашмакъта. Сизни ольдюреджек, тедебир алынъ!» десем, манъа инанырсынъызмы?»

Меккелилер де:

«Инанырмыз. О дагънынъ аркъасыны коръмесек де. Чюнки Сен «Мухаммед-уль Эмин»синъ, берген хаберинъ догъру олгъанындан асла шубемиз ёкъ!»- деген эдилер.

Бунынъ узерине О Варлык Нуру Эфендимиз:

«Эгер бунъа инана исенъиз шунъа да инанынъыз ки, бу алемни яраткъан, тек ве къадир олгъан бир Аллаһ бар! Тапынгъанынъыз путлар, кучъсюз бирер таш, топракъ я да одун парчасыдыр. Буларны терк этип бир олгъан Аллаһкъа иман этинъиз. Билинъиз ки, Аллаһ мени сизге Пейгъамбер оларакъ ёллады», - деген эди. Насипсиз мушриклер де, башта эмджеси Эбу Лехеб олмакъ узъре:

« Бу ерге бизни бунынъ ичюн чагъырдынъмы?»- деп Ондан юзь чевирдилер ве о ерден дагъылдылар. Виджданлары бунынъ догъру олгъаныны къабул эткени алда нефсаний истеклерине уйып, Оны яланджылыкъта къабатладылар.



Факъат Пейгъамберимиз, бойле гъафлет ве сап-къынлыкъкъа рагъмен ёлундан дёнмеди, небевий бир гайретнен иляхий акъикъатларны сувсуз гонъюллерге бир аят суву киби такъдим этмеге девам этти.

Иште, хадж эснасында бойле ибретли акъикъатларны тевеккюр этип, алыджы бир гонъюльнен этрафкъа бакъсакъ, Эфендимиз -алейхиссалату vessелям-нынъ дин дерслери отъкертени Эркамынъ эвининъ огюнден кечкенде, Аллах къоркъусы ичинде кечирильген Къуран талимлерининъ акислерини ис этермиз. Бу талимлернинъ артындан кельген хиджрет ве сонърасында яшангъан иляхий берекетлерге гонъюль синимизни узата билирмиз.

Бильхасса, Севр магъарасыны корьгенде, Азрети Пейгъамбер -саллаллаху алейхи ве селлем- ве Азрети Эбу Бекир арасында олгъан маневий алыш-вериштен насип алырмыз. О къобада, Пейгъамберимизнинъ Эбу Бекирнен учъ кунъ ичинде иляхий сырларгъа гъаркъ олып, къальплерни инкишаф эттирген хусусий субетлерине имкянымыз нисбетинде биз де иштирак этермиз. О субетнен башлагъан муаббет ве ашкънен иманнынъ лезетини татмакъ мумкюндир.

Бу лезетни таткъан сонъ, асхаб-ы кирамгъа⁴ таби олур, бинъ бир икмет ве ибрет толу Медине-и Муневвере хатыраларындан сонъра текрар Мекке-и Мукерремеге къайтар, о мубарек ерлернинъ Азрети Пейгъамбер -саллаллаху алейхи ве селлем- тарафындан фетих этильгенини хаял этип козьлеримиз огюнде джанландыра билирмиз.

Этрафтаки дагъларгъа бакъкъанда Меккени фетих этмеге кельген сахабе ордусынынъ мушриклерни къоркъутмакъ макъсадынен якъкъанлары бинълердже

4 **Асхаб-ы кирам** – Пейгъамбер эфендимизнинъ аркъадашлары. Онынъ заманында Ислямны къабул этип яшайышларында бир кере Пейгъамберни корьген инсанларгъа берильген ад.



мешгәлелерини зиинимизде джанландырырмыз. Билялы Хабешининъ о кунъ Бейтуллахнынъ устуне чыккып окъугъан эзанынынъ сесини дуяр киби олурмыз. Азрети Пейгъамбер -саллаллаху алейхи ве селлем-нинъ:

«...Хакъ кельди, батыл йыккылды...» (эль-Исра, 81) аетини окъуп, Кябедеки путларны девиргенини хаял этермиз.

Сонъра гонъюлимизнинъ де бир Кябе киби тюшюнип, оны нефсаний муаббетлерге путхане ола биледжегини къаврап, хаджнынъ эр адымында къазангъанымыз руханий ве маневий къуветнен о путларны девирмеге ве гонъюлимизни кямил манада бир назаргях-ы иляхий⁵ япмагъа тырышмалымыз.

Бойле даа нидже иляхий сырларнынъ аян олмасына къапы ачкъан хадж ибадети, эр кес ичюн маневий бир темизленме, арынма ве тирильме ибадетидир. Бу тирилювни теминлеген хадж ибадети, инсаннынъ динини текмиллештирген ибадеттир.

Хадж - варлыкъ ве нефис эльбиселерини ташлап, руханий бир яшайышкъа адым атмакътыр. Хадж - инсан рухунынъ озъ аэнкини, иклимини ве ренкини тапкъан бир ибадеттир. Рухнынъ асылыны тапкъан, рахмет ягъмурларынен ювулып арынгъан, руханий корюнишлернен толу бир ибадеттир.

АРАФАТ

Арафат, бир аф ве ялварыш еридир.

Арафат - къабирден къыямет сабасында уярмакъны ве джемаат алында махшер⁶ мейданында топланмакъны

5 **Назаргях-ы иляхий** – **назаргях**: Бакъылгъан ер, бакъма ери. **Назаргях-ы иляхий**: Аллаһнынъ назар эткени ер.

6 **Махшер мейданы** – Къыямет куню бутюн инсанларнынъ эсап бермек ичюн топлангъанлары мейдан.



хатырлатыр. Бутюн кьулла, Аллаһнынъ огюнде аджиз, мухтадж ве умютли бир шекильде аф беклерлер. Гонъюллер ве козьлер, тевбе яшларынен сыланыр, Аллаһкьа нидже самимий ялварувлар юкселир. Аят дефтерлеринде тер-темиз саифелер ачылыр ве Аллаһкьа, кьалгъан омюрнинъ итаат узьре яшанаджагъына сёзлер берилир.

Бойледже Арафат, саньки махшер кунюнинъ бир мисалини бизге косьтерир. Къыямет алларындан бир къысмы Арафатта яшаныр. Акъикъатен о ер, саньки къабирден турып инсаннынъ озь гунахларындан пешманлыкъ дуйып, озюни кьуртармагъа тырышкъаныны, чаресизлик ичинде чырпынып Раббине гонъюльден ялвармасыны анъдырыр. Эки без парчасына ортьюли, башы ачыкъ, ялынаякъ, бутюн дюньявий рутбелерден союзмакъ алыдыр...

Башкьа тарафтан Арафат, бизлерни эски хатыраларгъа алып бара. Ясакъ мейвагъа якълашкъанлары ичюн Аллах Адем -алеяхисселям-ны ве Ава анамызны дженнеттен чыкарып дюньяда бири-биринден узакъ, айры- айры ерлерге эндирди. Бойледже бири-бирине асрет кьалдылар.

Адем -алеяхисселям- Азрети Мухаммед -саллаллаху алейхи ве селлем-нинъ Аллаһ кьатындаки шереве итибарыны анълап, Аллаһтан Пейгъамберимизнинъ урьметине афу истеди. Бу дуасы къабул олды ве Аллаһ Таала онъа Мекке ёлуны косьтермеси ичюн бир мелек ёллады. Бу дуа берекетинен Джидде шеэринде яшагъан Ава анамыз да, башкьа бир мелек реберлигинде Адем -алеяхисселям-гъа догъру ёлгъа чыкъты ве бир арефе куню экинди вакъты Арафат вадийсинде корюштилери. Агълаштылар ве текрар Аллаһтан афу тиледилер.

Соньсуз ихсан ве керем саиби Аллаһ, оларны багъышлады. Бундан да башкьа, эр йыл айны кунь ве саатте оларнынъ неслинден къыяметке къадар бу ерге келип,



Аллахтан афу истегенлернинъ эписини багъышлайджагъыны да ваде этти. Хаджыларнынъ арефе куню Арафаткъа чыкъып, япкъан гунахларындан Аллахтан афу тилемелери бу икметке багълыдыр.

Бундан сонъ, Адем -алейхисселям- ве Ава валидемиз, Аллахнынъ эмринен бугунъ Мекке шеэри олгъан ерге ерлештилер. Бундан отърю ве ильк мекян олувы себебинен Мекке шеэрининъ башкъа бир ады да «Уммуль-Къура»дыр, «шеэрлернинъ анасы» деген мананы анълатыр.

Зира Мекке - ватан, ренк, зенгинлик-факъирлик, кийим-къушам киби кечиджи ве нисбий фаркъларнынъ ёкъ олып, бутюн инангъанларнынъ Ислям къардашлыгъы ичинде тек бир миллет олгъаныны косътерген акъикъятнынъ нумайышыдыр. О ерде эмир-мемур, зенгин-факъир, джаиль-алим эп бир арада, айны урбалар ичинде, айны мейданда ве айны сафтадыр. О ер- фаний фаркълылыкълардан айрылып, кефенге сарылып киби Раббине ялварма еридир. Къыяметнинъ о дешетли манзарасындан къоркъып, тюшюнмек еридир.

О мубарек ерлер, эминлик, сеадет ве муаббет къучагъы, гонъюллерни джоштургъан, берекетлендирген ве рахметнен толдургъан Пейгъамберлер юртудыр. Кунюмизде, Ислам дюньясынынъ бутюн изтирапларына рагъмен о мубарек мекянларда хадж ве умре вакътында корюльген бирлик, къардашлыкъ ве муаббетлик - дюнья миллетлерининъ хаялыдыр. Бу миллетлер, фаркълы тешкилятлар къууракъ, бойле бирлик-бераберлик ве къардашлыкъ севиесине етишмеге тырышалар ама, бу хусуста мувафакъиетке иришип оламайлар. Чюнки оларнынъ маддий вариетлерининъ янында маневий зайыфлыкълары, сайысыз айрылыкъ, пахыллыкъ, душманлыкъ, зулум, акъсызлыкъ ве адалетсизлик ич бир заман эксик олмамакъта.



МУЗДЕЛИФЕ ве КЪУРБАН

Арафаттан сонъ сырамыз **Музделифеге** келе. Къуран-ы Керимде **«эль-Мешаруль-Харам»** оларакъ ишарет этильген рахмет толу мекяндыр. Бу ерде Аллахнынъ буюклигини ве къудретини тюшюнип, пишкинлешкен инсан, дюньяны ве атта ахиретни биле артына атып, буюк бир муаббет ве теслимиет ичинде ялынъыз Аллаһкъа ёнелишни огренюв еридир.

Азрети Ибрахим-алеихисселям-нынъ Хакъкъа те-веккюль ве теслимиетини темсиль оларакъ кесильген къурбанлар, хаджыларнынъ гонъюль дерьяларында о юдже Пейгъамбернинъ дуйгъуларыны далгъаландыргъан бир рахмет ве хикмет эсинтисидир. Буны тюшюнип еткенлернинъ тиллеринден Халилюллахнынъ Къуран-ы Керимдеки шу сёзлери тёкюлир:

«Мен ханиф оларакъ, юзюмни коклерни ве ерни ёкътан яраткъан Аллаһкъа чевирдим ве мен мушриклерден дегилим.» (эль-Энам, 79)

«Де ки: Шубесиз, меним намазым, къурбаным, аятым ве олюмим – эписи алемлернинъ Рабби Аллаһ ичюн-дир. Онынъ ортагъы ёкътыр. Манъа садедже бу эмир олунды ве мен мусульманларнынъ илькисийим.» (эль-Энам, 162-163)

Азрети Ибрахим -алеихисселям-, Бабильден⁷ Шамгъа⁸ догъру кеткенде:

«Мен Раббиме кетем. О манъа догъру ёлны кось-тереджек. Раббим! Манъа салихлерден оладжакъ бир эвлят бер, деди.» (эс-Саффат, 99-100)

Бу ерде, къальптен, яни ич алемден энъ юдже Досткъа, Аллахкъа догъру япылгъан бир ёлджулыккъа ишарет бар.

7 **Бабиль** – Вавилон.

8 **Шам** – Дамаск.

Ает-и керименинъ девамында Азрети Исмаилнинъ мужделенмеси ве къурбан адисеси акъкъында бильги берилир:

«Иште, о вакъытта биз оны акъыллы (тербиели) бир огъулнен мужделедик.» (эс-Саффат, 101)

«Бабасынен берабер юрип кезеджек чагъына иришкенинен: Авруджыгъым! Руяда сени богъаз-лагъанымны корем; Бир тюшюн, не дерсинъ? деди. О да джевабен: Бабачыгъым! Эмир олунгъан шейинъни яп. Иншааллаһ, мени сабыр эткенлерден булурсынъ, деди.» (эс-Саффат, 102)

«Эр экиси де теслим олып, оны ян узерине яткъызгъанынен: Эй, Ибрахим! Руяныны керчеклештирдинъ. Биз яхшыларны бойле мукафатландырырмыз. Бу, акъикъатен, чокъ ачыкъ бир имтиан, дие сеслендик.» (эс-Саффат, 103-106)

«Биз, огълуна беделъ оларакъ, онъа буюк бир къурбан бердик. Арттан келеджеклер арасында онъа (яхшы бир нам) къалдырдыкъ: Ибрахимге селям! дедик. Биз яхшыларны бойле мукафатландырырмыз. Чюнки, о, бизим му'мин къулларымыздандыр.» (эс-Саффат, 107-111)



Азрети Ибрахим -алейхисселям- ханымы Хаджер иле огълу Исмаил -алейхисселям-ны Меккеге кетирип быракъгъан сонъ, Саре валидемизнинъ янына къайтты. Арада бир оларны зиярет эте эди. Бир сеферинде Меккеде бир тюш коръди. Тюшюнде Исмаил -алейхисселям-ны къурбан эте эди. Ибрахим -алейхисселям- бу руя шейтанданмы, Аллахтанмы деп шубеленди. Анджакъ бу тюш учъ кунъ девам этти. Бу кунълер, хадж мевсимининъ теврие⁹, арефе ве байрамнынъ биринджи куню эди.

Бир риваетте Ибрахим -алейхисселям-:



«Аллаһ манға бир огъул берсе, оны къурбан эте-
джем!»-деди. Иште бу сёзю себебинен Аллаһ оны сына-
ды.

Раббисинден кельген иляхий эмир узьре Ибрахим
-алейхисселям- Хаджер валидемизге, огълу Исмаилни
ювундырмасыны ве гузель къокъулар сюртмесини рид-
жа этти. Оны бир достуна алып бараджагъыны сёйледиди.
Азрети Исмаилге де янына бир йип ве пычакъ алмасыны
сёйледиди ве:

«Огълум, Аллаһ ризасы ичюн къурбан кеседжем!»
- деди.

Минагъа догъру ёл алмагъа башладылар. Бу сырада
шейтан, инсан шеклине кирип Хаджер анамызнынъ яны-
на кельди ве Онъа:

«Ибрахим огълуну не ерге алып кете, билесинъ-
ми?», - деди.

О да:

«Достуна алып кете», - джевабыны берди.

Шейтан:

«Хайыр, оны соймагъа алып кете», - деди.

Хаджер валидемиз:

«О, огълуну чокъ север!», - деп джевап берди.

Шейтан девам этип:

«Аллаһ эмир эткени ичюн сояджакъ экен!», - дейин-
дже Хаджер валидемиз:

«Эгер Аллаһ -джелле джелялюху- эмир этти исе гу-
зель бир шейдир. Онъа тевеккуль этермиз», - деди.

Шейтан, Хаджер валидемизни къандырамагъан
сонъ Исмаил -алейхисселям-нынъ янына кетти. Бу сефер
де Ондан сорады:

«Бабанъ сени не ерге алып кете, билесинъми?»

Исмаил -алейхисселям-:

«Раббимизнинъ эмирини ерине кетирмеге», - деди.

Шейтан:

«Билесинъ ки, сени соймагъа алып кете!», - деп вес-
весе берди.



Бунунъ узерине Азрети Исмаил:

«Деф ол, лянетли шайтан! Биз, Раббимизнинъ эмири-ни севе - севе ерине кетирирмиз!», - деп джевап берди ве шейтанны къувды. Онъа таш атты.

Шейтан, Исмаил -алейхисселям-ны да къандырамады. Бу сефер Ибрахим -алейхисселям-гъа дѣнди:

«Эй къарт! Огълунъы не ерге алып кетесинъ? Шейтан сени руяндa къандырды! О тюшлер шейтаний эди.», - деди.

Ибрахим -алейхисселям-:

«Сен шейтансынъ! Аман янымыздан узакълаш!», - деди.

Элине едишер таш алды ве шейтангъа учъ ерде таш атты.

Хадж эснасында, къыяметке къадар шарт оларакъ девам этеджек олгъан шейтангъа таш атма, бу шекильде башлады. Бу ал, оларнынъ тевеккуль ве теслимиетлерининъ бир нишанеси оларакъ Мухаммед умметине нумюне олды.

Азрети Ибрахим, огълу Азрети Исмаилни къурбан этмеге алып кеткенде коктеки мелеклер эйеджанландылар. Айрет иле:

«Субханаллах! Бир Пейгъамбер башкъа бир Пейгъамберни къурбан этмеге алып кете!», - дедилер.

Ибрахим -алейхисселям- огълу Азрети Исмаилге бу ишнинъ акъикъатыны анълатты:

«Эй огълум, тюшюмде сени къурбан этмем эмир этильди...»- деди.

Исмаил -алейхисселям-:

«Бабачыгъым, буны санъа Аллаһ эмир эттими?»- деп сорады.

Ибрахим -алейхисселям-:

«Эбет!» - деди.

Бунунъ узерине Исмаил -алейхисселям-:

«Бабачыгъым! О заман сен эмир этильген шейни яп!

Иншааллах, мен сабыр эткенлерден олурым!» - деди.



Джаныны феда этмеге азыр олгъаныны бильдирди. О сырада Исмаил -алейхисселям- даа еди я да он учъ яшларында эди.

Риваетке коре Джебраиль -алейхисселям- эеджанланып, зорнен етишкени учъ вакъиа олгъан эди. Ибрахим -алейхисселям-нынъ огълу Исмаилни къурбан этмек узъре пычакъны богъазына даядыгъы ан булардан бири эди. Джебраиль -алейхисселям- пычакъны токъаллаштырды. Аллаһ Таалагъа там манасынен теслим олгъанлары ичюн, Аллаһ бир лютф оларакъ дженнеттен бир къочкъар къурбан этильмеси ичюн ёллады. Бойледже, текбирлернен о къочкъарны къурбан этилер.

О заман, къурбан кесмектен асыл макъсат, бу адиселерни тюшюнип иляхий икметлерден насип алмакъ, Аллаһкъа теслимиет косътермек ве такъва иле къуллукъ этмеге тырышмакътыр. Аллаһ буюрыр:

«(Къурбанларнынъ) не этлери, не де къанлары Аллаһкъа етишир; факъат Онъа садедже (ялынъыз) сизинъ такъванъыз етишир...» (эль-Хадж, 37)

Дигер тарафтан хаджда къурбан кесильген сонъ сачларнынъ тыраш этильмесининъ де айры бир икмети бар. Ислямдан эвель, бир кимсе къулуны урриетке къавуштырса, сачларыны устра иле тыраш эте эди. Бу да, онынъ къул олгъаныны косътерген бир ишарет ола эди. Хадж эснасындаки тыраш да инсаннынъ Аллаһнынъ даимий къулу олгъаныны къабул ве итираф этмесидир. Бу тырашнен кендимизни Аллаһкъа адар ве Онъа теслим олурмыз.

МИНА ве ШЕЙТАНГЪА ТАШ АТ-МАКЪ

Мина Азрети Ибрахим ве Азрети Исмаилнинъ шейтангъа таш атып, онъа къаршы музаффер олувары, къулнынъ эр заман Раббине таянмасы ве теслим олмасы



керек олгъаныны телькын эткен мубарек бир мекян-дыр.

Шейтангъа таш атмакъ да, башта ичтеки шейтан-ны ташкъа тутмакънен башлар. Хаджнынъ бир рюкню олгъан шейтангъа таш атылмасы да, Азрети Ибрахим, Азрети Исмаил ве Хаджер валидемизнинъ шейтанны къувып, ташламаларынынъ бир хатырасыдыр.

Таш атмакъ - тельин, яни лянетлеме манасындадыр. Зира о девирде лянетлеме, таш атмакънен япыла эди. Бу себепле шейтангъа «раджим» яни таш атыларакъ лянет-ленген денильмекте.

Шуны да сёйлемек керек ки, ерден алынып атыл-гъан таш, гунахкъа атылгъан таштыр. Ниет - Аллаһнынъ ризасына етмектир. Бу себепле Расуллаллах -саллаллаху алейхи ве селлем- шойле буюрды:

«(Шейтан)гъа таш атмакъ ве Сафа иле Мерве арасында сай япмакъ, анджакъ Аллаһны анъмакъ ичюн эмир этильди.» (Тирмизи, Хадж, 64/902)

Кене чакъыл ташларыны атмакътан макъсад, шей-танны ашаламакътыр. Чюнки о, Азрети Адемни топракъ-тан яратылды деп кучюксинди, озюни атештен яратылды деп гъурурланды. Аллаһ да оны ашаламакъ ичюн, бу уфакъ таш данелеринен ташлатмакътадыр.

Бу ерда шейтангъа таш атылмасынен барыладжакъ шуур ве хассаслыкъ, яшайышымызнынъ тамамыны зий-нетлемели. Шейтаннынъ къальпке берген весвеселери;

«أَعُوذُ بِاللَّهِ مِنَ الشَّيْطَانِ الرَّجِيمِ»

«Ташларнен къувулгъан шейтаннынъ шеррин-ден Аллаһкъа сыгъынырым.» ифадесинен ёкъ этиль-меси керек. Бойледже, сонъ нефеске къадар, эр фырсатта шейтанны ташламакъ зарурдыр. Аллаһ буюрыр:

«Эгер шейтандан кельген яман бир тюшюндже сени тюртеджек исе, аман Аллаһкъа сыгъын!...» (Фуссилет, 36)



Нетиджеде шейтанны ташкъа тутмакъ, оны лянет-лемек ве гонъюлни гъафлет ве весвеседе узакъ тутып, Аллаһкъа ёнельмектир.

Хадж ве умре ибадетини япкъанда да шу тюшюнджени акъылдан чыкармамакъ керек:

Хырсыз, къуюмджы тюкяны бар олгъанда эскиджининъ тюкянына кирмез. Чюнки къыйметли зийнетлер къуюмджы тюкянында олур. Ибадет эткен бир мумин иле ибадеттен узакъ бир инсан да бунъа бензер. Инсанларны догъру ёлдан къайтаргъан шейтан, ибадет эткенлернинъ пешинден даа чокъ чапар. Бунынъ ичюн хадж ве умреге ниетленген бир кишиге даа чокъ уджюм этер. Бу себепнен хадж япаджакъ инсан башта **«сабыр»** сиясынен зийнетленмелидир. Зира хадж, дигер ибадетлерден фаркълы бир ибадеттир. Шекиль бакъымындан къолай корюнир, анджакъ энъ зор ибадетлерден биридир. Бунынъ ичюн, ниет эткенде:

«Аллаһым! Оны манъа къолайлаштыр!..» ифадеси ер алмакъта.

Хадж ве умреде:

لَبَّيْكَ اللَّهُمَّ لَبَّيْكَ، لَبَّيْكَ لَا شَرِيكَ لَكَ لَبَّيْكَ،
إِنَّ الْحَمْدَ وَالنَّعْمَةَ لَكَ وَالْمُلْكَ لَا شَرِيكَ لَكَ

«Буюр Аллаһыми Санъа кельдим! Сенинъ эмринъе уяракъ кельдим. Сенинъ ич бир ортагъынъ ёкътыр. Эмринъе итаат этерек кельдим буюр Аллаһым! Хамд ве ниет Санъа аиттир. Мульк те Сенинъдир. Сенинъ ич бир ортагъынъ ёкътыр.»

диерек гонъюллер Аллаһкъа сыгъынырлар, Раблерининъ даветине кельгенлерини тасдыкъларлар ве Онынъ салтанатында Ондан башка танъры олмагъаныны къабул этерлер. Бойледже, шейтаннынъ ве озъ арзуларынынъ пешинден кетмейджегине сёз бергенлердир.



Муминге тюшкен вазифе, шейтаннынъ бутюн ту-
закъларына кършы уяныкъ олмакътыр. Бу мешакъкъат-
лы ёлджулыкъ эснасында мейдангъа келеджек кыйын-
джылыкълар кършысында вазгечмемек, сабыр этмек ве
бунынъ имтиан олгъаныны билип, хадж ве умре ибадети-
ни тамамламакътыр.

«САФА» ВЕ «МЕРВЕ» ТЁПЕЛЕРИ ВЕ СА'Й

Сафа ве Мерве тёпелери – Исмаил -aleyхиссе-
лям-нынъ анасы Азрети Хаджернинъ къркъу ве эеджан
ичинде сув тапмакъ ичюн чапкъалап тургъан эки тёпе-
дир. Бу себепнен Сафа иле Мерве тёпелери арасында ке-
тип кельмек, инсаннынъ Аллахъа буюк бир самимият
ве аджизлик итирафы ичинде сыгъынмасыдыр. Бунынъ
ичюн Са'й - хадж ибадетининъ эсасыдыр.

Аллах, бу эки тепенинъ эмиетини шойле ифаде бу-
юра:

إِنَّ الصَّفَا وَالْمَرْوَةَ مِنْ شَعَائِرِ اللَّهِ

**«Шубе ёкъ ки, Сафа иле Мерве Аллахнынъ
къойгъан нишанларындандыр...»** (эль-Бакара, 158)

Муминлер, Аллахнынъ нишанларгъа нисбетен на-
сыл тавыр тутмасы керек олгъаныны Раббимиз шойле
беян буюрмакъта:

**«...Эр ким Аллахнынъ нишанларына сайгъы
косътерир исе, шубесиз, бу, къальплернинъ такъва-
сындандыр.»** (эль-Хадж, 32)



КЯБЕ-И МУАЗЗАМА

Кябе-и Муаззама - Муминлернинъ кыбласыдыр. Аллаһнынъ Къуран-ы Керимде: «...Седжде эт ве якълаш!» (эль-Алякъ, 19) деп эвр эткени намаз ибадетинде дёнеджегимиз истикъаметтир. Айны заманда бутюн мусульманларнынъ топлуджа чевирильгенлери нокъта, Ислям дюньясынынъ набызынынъ аткъан еридир.

Аллаһ инсаннынъ къальбине иляхий сырларыны насыл аян этсе, кяинаттаки сырларыны аян эткен ер де Кябедир. Яни кяинат ичинде Кябе, инсан вуджутында къальп кибидир. Бу себепнен хадж ибадети, Кябенинъ буюклигини анълап, хулюс юрекнен япылмасы керек.

Бейтуллах, яни Аллаһнынъ эви оларакъ билинген Кябе, Адем -aleyхисселям-дан башлап мукъаддес ибадет ери сайылмакъта. Эвельден берли кучю еткенлерге Кябеге барып хадж этмелери фарз олгъаны шу ает-и керимелерде бильдирильгендир:

«Шубесиз, алемлерге берекет ве хидает чокърагъы оларакъ, инсанлар ичюн къурулгъан ильк эв (мабет) – Меккедеки (Кябе)дир.

О ерде ап-ачыкъ нишанелер, (айрыджа) Ибрахимнинъ макъамы бардыр. О ерге кирген эп ниетте олур. Ёлуна кучю еткенлернинъ о эвни хадж этиюви – Аллаһнынъ инсанлар узеринде бир акъкъыдыр. Ким инкяр этсе, бильмели ки, Аллаһ бутюн алемлерден мустагънийдир.» (Ал-и Имран, 96-97)

Кябе-и Муаззамада, **«Макъам-ы Ибрахим»¹⁰** - Халилуллах Ибрахим -aleyхисселям-нынъ макъамы бар. Аллаһ, хадж я да умре япкъан муминлерге, онынъ аякъ излерининъ олгъаны о мубарек ерде юрюмекни ве онынъ макъамынынъ аркъасында таваф намазыны къылмакъны эмир этмектедир.

10 **Макъам-ы Ибрахим** – Ибрахим -aleyхисселям-нынъ Кябени къургъанда я да инсанларны аджылыккъа давет эткенде устюнде тургъан таш.



Кябени таваф эткенде селям берип урьметнен опюльген «Хаджер-и Эсвед»¹¹ де, Аллаһнынъ эмирине итаат ве къуллукъ этиледжегине даир сёз берильген макъамдыр. Оны селямламакъ, бутюн нефсаний истеклерден ве шейтангъа уймакътан озюни чекмеге сёз бермектир.

Хаджер-и Эсвед, тавафнынъ башланмасыны ве екюнленмесини косътерген бир ишареттир. Кябенинъ бугунъге къадар аман-аман бутюн ташлары денъишти. Факъат Хаджер-и Эсвед ич денъишмеди ве кунюмизге къадар кельди. Оны, башта Пейгъамберлер Султаны Эфендимиз -алейхиссалату vessелям- олмакъ узьре нидже мубарек дудакълар опыти, нидже мубарек эллер онъа токъунды. Бойледже о, гонъюллеримизге севги ве муаббет берди ве юдже ерге саип олды.

Къыскасы, Кябе - иляхий Аршнынъ¹² дюньяда кольгеси, рахмет ве берекет менбасыдыр. Аллаһнынъ рахмет ве магъфирет сыфатларынынъ буюк бир кузьгюсидир. Гонъюлнерни айдынлаткъан кунеш кибидир.

Кябенинъ япылмасы акъкъындаки риваетлерге коре, Азрети Адем иле Ава анамыз, дженнеттен чыкъарылгъан сонъ Арафатта бир бирине къавуштылар, сонъра берабер Кябе булунгъан ерге догъру кеттилер. Адем -алейхисселям- бу къавушмагъа шукюр япмакъ ичюн Раббине ибадет этмеге истеди. Дженнетте экенде, этрафында таваф этип, ибадет эткен нурдан яратылгъан терекнинъ озюне текрар берильмесини истеди. Бу истек узьре о ерде нурдан бир терек корюнди. Азрети Адем де онынъ этрафында таваф этип, Аллаһкъа ибадет этмеге башлады.

11 **Хаджер-и Эсвед** – Кябе диварында кумюшнен черчевленген къара таш.

12 **Аллаһнынъ Аршы** – 1. Юксеклиги ве буюклиги себебинен бутюн варлыкъларны ичине алгъан шей. 2. Аллаһнынъ къудрет ве азаметининъ корюнгени докъузынджы къат кок, кокнинъ энъ юксек къаты.

Бу нурлу терек, Азрети Шит¹³ -алейхисселям- заманында гъайып ола, еринде къара бир таш къала. Бунунъ узерине Азрети Шит, онынъ ерине таштан, дёрткоше бир бина къурды ве о къара ташны бинанынъ бир кошесине ерлештирди. Иште, бугунъ **Хаджер-и 'Эсвед** адынен белли олгъан къара таш, о таштыр.

Нух Туфаны эснасында бу бина, узун бир муддет къумлар астында къалды. Азрети Ибрахим -алейхисселям-, Аллаһнынъ эмири иле Кябе булунгъан ерге кетти, огълу Исмаил -алейхисселям-ны ве анасы Хаджерни о ерге ерлештирди. Бир заман кечкен сонъ, Исмаил -алейхисселям- иле берабер Аллаһнынъ эмиринен Кябенинъ ерини къаздылар. Азрети Шит тарафындан япылгъан бинанынъ темеллерини таптылар ве о темеллер узерине Кябе-и Муаззаманы инша эттилер.

Ибрахим -алейхисселям- Кябени къурып битирген сонъ Аллаһкъа шойле дуа этти:

«...Эй, Раббим! Бу ерни ишанчлы бир шеър яп, халкъындан Аллаһкъа ве ахирет кунюне инангъанларны чешит мейваларнен бесле!...» (эль-Бакара, 126)

Ибрахим -алейхисселям-нынъ бу дуасынынъ берекетинен Меккеде иман тадынен агъыз тады ич ичедир.

Кябенинъ тамири ве къурулышы аша-юкъары он бир дефадыр:

Биринджиси мелеклер тарафындан, экинджиси Адем -алейхисселям-, учюнджиси Шит -алейхисселям, дёртюнджиси Ибрахим -алейхисселям-, бешинджиси Амалика къабилеси, алтындыжысы Джурхумилер, единджиси Къусай, секизинджиси Къурейш, докъузындыжысы асхаб-ы кирамдан Абдуллах бин Зубейр, онындыжысы Хаджадж ве он биринджиси де Османлы султаны IV. Мурад Хан тарафындан къурулды.

Османлы девлети Кябе-и Муаззаманы буюк эдеппен тамир этти. Шойле ки:

13 **Азрети Шит** – Адем -алейхисселям-нынъ торуны. Бир пейгъамбер.



Султан IV-джи Мурад девринде бир сельден сонъ Кябенинь эки дивары чёкти. Бунынъ узерине тамир ичюн Мимар Ридван Агъа Меккеге ёлланылды. Чёккен ерлерини тесбит эткен Ридван Агъа, Кябе-и Муаззама акъкъында «йыкъылма ве чёкме» киби сёзлер къуланмайып, эдепке уйгъун оларакъ шойле деди:

«Кябетуллахнынъ шу-шу къысымлары седжедеге къапанды.»

Бундан башкъа, тамир эснасында да иншаат ичюн керекли шейлерни ташыгъан айванлар о мубарек мекянарны кирлетмесин деп бир такъым тедебирлер алынды.

ЭДЖЕЛЬ КЕЛЬМЕДЕН...

Акъылымызда тутмамыз керек ки, аят инсангъа бир кере махсус оларакъ берильген ниметтир. Олюм де, Аллаһнынъ бутюн махлюкъат ичюн къойгъан зарур бир къанундыр. Олюмнинъ заманы, дакъикъасына къадар, нефес сайысына къадар тайин этильген ве укюмге багълангъандыр.

Эджель не илери, не де кери кетмез, бир ан биле не огге я да арткъа алынамаз. Эджельден къачкъанлар ондан ич бир кере къуртулмадылар.

Бунынъ ичюн хадж ибадетини ерине кетиргенлер, бу керчекни эйи тюшюнип бу буюк ибадетни джан гонъюльден, хулюс юрекнен япмалары керек. Зира омюр сонъуна эргенде пешманлыкъ бир файда бермейджек. О алда кучюмиз даа элимизде олгъанда, Раббимизнинъ эмир эткени бу буюк хадж ибадетине эмиет косьтерип, ильк фырсаатта бу борджумызны ерине кетирмемиз керек. Акси алда Азрети Пейгъамбер -саллаллаху алейхи ве селлем-нинъ хатырлатмасы пек мудхиш ве коркъутыджыдыр:

«Бир кимсе, аш, сув ве минеджек айваны масрафларына саип олып да Бейтуллахкъа кетмек мумкюн экенде



хадж этмесе, онынъ еудий я да христиан оларакъ ольмесе ич бир мания ёкътыр!» (Тирмизи, Хадж, 3)

Пейгъамберимизнинъ бу хатырлатмасы, хаджнынъ бутюн шартларыны ортагъа къоймакъта. Бу ибадетке кереги киби эмиет бермегенлер насыл дешетли гъайып ичинде оладжакъларыны ап-ачыкъ косътермекте. Демек ки алы, вакъыты еринде олгъан муминлер хадж ибадетине гъафлет къалмалары пек буюк гъайып!..

Имкяны олгъан эр мумин омюринде бир дефа хадж этмеси фарздыр. Текрар-текрар хадж этмек исе мустехаб, яни макъталгъан бир арекеттир ве севабы чокъ буюктир.

Бу себептен Аллаһ Расули -саллаллаху алейхи ве селлем- шойле буюрды:

«Хадж иле умрени арт-арткъа япмакъ, омюрни ве рызыкъны арттырыр, факъирликни ве гунахны, кёрюгъюн демирдеки тотны алгъаны киби алып атар.» (Ахмед, III, 446-447)

Башкъа бир хадисте шойле буйрулмакъта:

«Аллаһ Таала буюра: Мен бир къулума сагълыгъыны ве рызыкъыны да бол берсем, о да эр дёрт сенеде Мангъа кельмесе (яни хадж я да умре этмесе) о кимсе керчектен артта къалгъанлардандыр.» (Хейсеми, III, 206)

Фарз олгъан хадждан башкъа япылгъан умрелерге ёнельтильген джаильдже тенкъид, -Аллаһ къорчаласын- Аллаһнынъ юкъарыдаки сёзюне терс тюшип, инсанны куфюрге алып бармасы мумкюндир. Бу сёзлер, темельсиз джаиллик себебинен сёйленмекте, иман ве ибадетнинъ акъикъий зевкъ ве лезетинден узакълашкъан къара ифаделеридир.

Акъикъатен фарз ибадетлерден башкъа япылгъан нафиле ибадетлер, сеадет асырындан¹⁴ берли буюк бир иман джошкъунлыгъы ичинде япыла кельди. Мисаль

14 **Сеадет асыры** – Пейгъамбер эфендимизнинъ асхабынен бирликте яшагъаны, фазилет ве сеадет асыры.



оларакъ, Имамы Азам Эбу Ханифенинъ 55 кере хадж эткени бизим ичюн бу хусуста бир орьнектир. Имамы Азам Эбу Ханифе, сайысыз талевеси ве бир чокъ ишлерине рагъмен, вакъытынынъ учте бирини хадж сеферине айыра эди. О девирдеки шартлар ичинде, деве иле Багъдаттан Мекке-и Мукерреме ве Медине-и Муневверени зиярет этменинъ не къадар къыйын бир ёлджулыкъ олгъаныны тюшонмек керек. Аллаһнынъ базы къуллары башкъа ич бир ерде олмагъан о маневий аваны Харамейнде¹⁵ аладжакъларыны бильгенлери ичюн, эр фырсагъта хаджгъа кетмекни ве Расулуллах -саллаллаху алейхи ве селлем-ни зиярет этмекни буюк гъанимет бильдилер.

Зира буюк бир иман эджаны ичинде япылгъан нафиле ибадетлер, къулнынъ Аллаһкъа якъынлашмасына ярдымджы олур. Рухны теренлештирир. Аллаһ, бойле мумин къулларынынъ корьген козю, эшиткен къулагъы олур. Яни оларнынъ корьмелери, эшитмелери, тюшонмелери ве ифаделери Аллаһнынъ рызасына уйгъун олур.

ТЕВЕККУЛЬ¹⁶ ВЕ ТЕСЛИМИЕТ¹⁷

Хадж ибадети инсан гонъюлини хассас япар. Чюнки Бейтуллах, Ибрахим -алейхисселям- ве къорантасынынъ Аллаһкъа таянмакънынъ ве Аллаһнынъ эмрине теслим олмакънынъ хатыралары иле толу бир мекандыр. Тевеккуль, теслимиет ве хадж келимелери эшитилиндже Ибрахим -алейхисселям- ве Исмаил -алейхисселям- хатырлавыр. Бунынъ ичюн хадж эснасында ерине кетирильген

15 **Харамейн** – месджид-и Харам (Кябе), месджид-и Небевий ве этрафлары.

16 Тевеккуль – Аллаһкъа таянмакъ, Онъа ишанмакъ. Эльден кельгенни япып нетиджени Аллаһтан беклемек.

17 Теслимиет – Аллаһнынъ эмрине теслим олмакъ, бойсунов.



пек чокъ мерасим, бу эки буюк пейгъамбернинъ ихлясла-
ры берекетинен къыяметке къадар текрарланаджакъ бирер
амел-и салихтир.

Тевеккуль - таянмакъ, ишанмакъ, векиль тутмакъ
ве векилге ишанмакъ маналарына келир. Тасаввуф или-
минде исе Тевеккуль - гонъюлини Аллаһкъа адагъан ве
Аллах севгисинен толу олгъан кимсенинъ ялынъыз Онъа
таянмасы ве Онъа сыгъынмасыдыр.

Аллаһ, Муса -aleyхисселям-дан элиндеки асасы-
ны сорады, сонъра; **«Ат оны элинъден!»** дие эмир этти.
Чюнки аса, Онынъ Раббине олгъан тевеккулини кольге-
лей эди.

Ает-и керимелерде шойле буйурыла:

**«...Инангъанлар анджакъ Аллаһкъа тевеккуль
этсинлер!»** (Ибрахим, 11; эт-Тевбе, 51)

**«...Эгер муминлер исенъиз, ялынъыз Аллаһкъа
тевеккуль этинъ!»** (эль-Маиде, 23)

**«...Ким Аллаһкъа тевеккуль этсе, Аллаһ онъа
етер!...»** (эт-Талакъ, 3)

Хадис-и шерифте де:

*«Эгер сиз акъкъынен тевеккуль эте бильсенъиз,
саба къарынлары ач (оларакъ чыкъып), акъшам токъ
(оларакъ къайткъан) къушлар киби (Аллаһ тарафындан)
рызыкъланырсынъыз!»* (Тирмизи, Зюхд, 33) буюрыла.

Тевеккуль - тедбирлерни бир кенаргъа атмакъ де-
гиль, аксине оларны ерине кетирип, Аллаһкъа сыгъын-
макътыр.

Аллаһ Таала буюрыр:

**«...Иш акъкъында оларнен акъыл таныш. Къа-
рарыны берген сонъ да, ялынъыз Аллаһкъа таянып
ишан. Чюнки, Аллаһ Онъа таянып ишангъанларны
север.»** (Ал-и Имран, 159)

Муминлернинъ эки джианда, дюньяда ве ахиретте
де ярдымджылары Аллаһтыр. Ким Онъа тевеккуль этсе,



Аллаһ онъа етерлидир. Эм шахсий, эм ичтимаий саада керчек сеадет, ялынъыз Аллаһкъа ёнельмекте, Ондан ярдым истемекте ве Онъа тевеккуль этмектедир.

Теслимиет - *سَلِّمْ се-ли-ме* фиилинден келир. Боюн эгмек, башына кельген адиселерни итиразсыз къабул этмек ве селяметке чыкъмакъ манасына келир.

Риваетлерге коре Ибрахим -aleyхисселям-нынъ къальбинде Аллаһтан башкъа ич бир шейге ер ёкъ эди. Бунынъ ичюн Аллаһ, онъа Халилюллах деди, яни оны дост къабул этти.

Мелеклер:

«Я Рабби! Ибрахимнинъ джаны, эвляды ве малы бар! Насыл санъа дост олур?!»- дедилер.

Аллаһ Таала да, Онынъ учъ ерде итираз этмейип теслимиет косътергени ичюн оны дост къабул эткенини мелеклерге сёйледі. Аллаһнынъ бу имтианлары ве не-тиджелери, къыяметке къадар мусульманларгъа мисаль оладжакъ.

Биринджи имтиан: Ибрахим -aleyхисселям- атешке атыладжакъы заман мелеклер ярдымгъа кельдилер. Анджакъ О:

«—Сизге ихтияджым ёкъ!.. Атешке янмакъ кучюни ким бермекте?» деди ве «Аллаһ не гузель векильдир!» деп Раббине сыгъынды.

Аллах Онынъ бу теслимиетине муяфат оларакъ атешке:

«Эй атеш! Ибрахимге салкъынлыкъ ве селямет ол!»- (эль-Энбия, 69) буюрды.

Экинджи имтиан: Джебраиль -aleyхисселям-нынъ Аллаһны учъ дефа зикр этмесинен, Ибрахим -aleyхисселям- бутюн малыны онъа берди ве:

«Ал, эписини алып кет!»- деди.

Учюнджи имтиан; Ибрахим -aleyхисселям- гъа эвляды Исмаилни къурбан этмеси эмир этильди. О, Ал-



лаһнынъ эмирине теслимиет косътерди ве бу имтианны кечти.

Керчек къуллукъ - теслимиеттир. Аллаһ -джелле джелалюху- кендисинден башкъасына къуллукъ этиль-месини истемез.

Теслимиет - муаббетке таянган итаат ишидир. Бу итаат ве теслимиет берекетинен Ибрахим -алейхисселям-гъа джаны, малы ве эвляды, юдже Раббининъ ёлунда мания олмады. Хадж ибадети, Онынъ Раббине тебеккуль ве теслимиетининъ гузель бир темсилидир.

Ибрахим -алейхисселям- шойле демекте:

«...Мен алемлернинъ Раббине теслим олдым!»
(эль-Бақъара, 131)

Хадж - Азрети Ибрахим ве Азрети Исмаил -алейхисселям-нынъ тебеккуль ве теслимиет косътерювлерининъ темсилидир. Инсаний сыфатлардан къуртулып магъфирет, теслимиет ве тебеккуль авасына кирмектир. Хадж - муаббет толу бир къуллукънынъ косътерилювидир.

Хадж ибадети бизге шуны косътермекте ки, инсан гунахларындан, анджакъ ялварыш, тебеккуль ве теслимиет толу къальпнен япылган ибадетлернинъ берекетинен темизленир.

Дигер тарафтан, хадж ве умре ичюн ёлгъа чыкъкъанлар, тебеккуль ве теслимиет хусусларыны догъру анъламалары керек. Маддий ве маневий ёл азырлыкъларыны эйи япмалары керек. Чюнки Йеменден кельген базы кимселер хадж ичюн Меккеге кельгенде: «Биз Аллаһкъа тебеккуль этемиз!» деп азырлыкъ япмадан ёлгъа чыкътылар. Меккеге кельгенлери заман да ачлыкътан тилендилер. Бунунъ узерине шу ает-и кериме эндирильди:

«...Ахирет ичюн азыкъ топланъ. Билинъ ки, азыкънынъ энъ хайырлысы такъвадыр. Эй, акъыл саиплери! Менден (эмирлериме къаршы келювден) сакъынынъ.» (эль-Бақъара, 197)

Ает-и керимеден анълашылгъаны киби, эм маддий азыкъ, эм де ондан даа муим маневий азыкъ о мубарек



топракъларда къазанылмакъта. Эльбетте ки, бу маневий азыкъ ялынъыз «такъва» дереджесине эрген селим къалып саиплерине насип олур. Зира Аллаһнынъ ахлякы иле ахлякъланмакънынъ энъ табиий нетиджеле-ринден бири де, такъва иле толу кениш бир гонъюльге саип олмакътыр.

МАКЪБУЛ ВЕ МЕБРУР ХАДЖ ве УМРЕ ИЧЮН КЕРЕК ОЛГЪАН МАНЕВИЙ ОЛЬ- ЧЮЛЕР

Аллаһ къатында хадж ве умренинъ **макъбуль** ве **мебрур** (хайырлы, бегенильген ибадет) олмасы ичюн шу ольчюлерге риает этильмеси керек:

1. Хадж ве умреге юректен, ихляс иле ниет этип, башкъа бутюн ниет ве арекетлерден вазгечмек:

Аллаһнынъ ризасыны ве лютфини къазанмакъ ичюн, хадж ве умре ибадетине темиз юректен ниет эткенде, ичимизде бутюн нефсаний анълашмалардан ве бешерий зайыфлыкълардан вазгечмемиз керек. О мубарек топракъларда кяинат китабыны окъумакъ ве маневий денъишмек лязим. Хадж ве умрени бойле бир анълайыш ичинде япкъанлар, иляхий рахмет ве берекетке наиль олурлар, иляхий сыр ве икметлер сарайына мусафир олурлар. Бундан сонъра:

2. Ихрам¹⁸ны киймек ичюн бутюн урбаларымызны чыкъаргъанымыз заман Аллаһтан башкъа эр шейни де юрегимизден чыкъармакъ:

Аллаһ ризасына уйгъун хадж ве умреге гонъюльден япылгъан ниеттен сонъ ихляс ве самимиетнинъ нумайышы оларакъ ихрам кийгенде, ялынъыз корюнген урбалар-

18 Ихрам – 1. Эки парча къумаштан ибарет аджылыкъ урбасы. 2. Базы эял шейлернинъ ихрамлы экенде харам олмасы (авланмакъ, от къопармакъ, траш олмакъ киби).



дан дегиль, ичимиздеки сервет, шурет, макъам ве мевкъ севгисинден да къуртулып, такъва урбасына бурюнмек керек олур. Аллах:

«Ич дюнъясыны темизлеген сеадетке эрди.» (эш-Шемс, 9) буюра.

О мукъаддес ерлерде гонъюльни Аллахкъа багълап, дюнъялыкъ ишлернен мешгъуль олмакътан ве пек керек олмадан базарларны кезмектен сакъынмакъ керек. Чюнки бу ишлер гонъюллерни мешгъуль этер ве гъафлетке тюшюр. Бойледже инсаннынъ, о мубарек ерлернинъ маневий авасындан файдаланмасы зорлашыр.

Аллах Расули -саллаллаху алейхи ве селлем-, хаджны тамамлагъан сонъ Меккеде даа чокъ къалмамакъ акъкъында:

«Мекке къалма ери дегиль. Тыштан кельген кимселернинъ, хадж ибадетлерини ерине кетиргенлеринден сонъ Меккеде анджакъ учъ кунъ калырлар.» (Ахмед, IV, 339) буюрды. Азрети Омер -радиаллаху анх- да, хадж ве умре ибадетлерини ерине кетергенлерге, вазифелерини тамамлагъан сонъ, Меккеде башкъа ишлернен мешгъуль олып хадж ве умре эснасында къазангъан мукъаддес дуйгъулары бозулмасын деп аман озъ ватанларына къайтмаларыны тавсие эткен эди.

Хадж ве умреде, Кябенинъ Раббине сыгъынмакъ ве **«...Онынъ, къулларына шах дамарларындан даа якъын...»** (Каф, 16) олгъаныны аныламакъ керек. Башкъа ает-и керимеде де, **«...Аллаһ, киши иле къальби ара-сына кирер...»** (эль-Енфаль, 24) демесинен, ич бир шейнинъ Ондан гизли къаламайджагъыны аныламасы керек. Яни дюнъявий, кечиджи севдалардан вазгечип, гонъюльнинъ Аллах иле берабер олмасы ичюн тырышмакъ керек. Чюнки хадж ве умренинъ озю шудыр:

3. Маддий ве маневий темизлик:

Аллах Расули -саллаллаху алейхи ве селлем- хадж ве умре ичинде япылгъан салих амеллер весилесинен барылгъан нетиджени анылатыркен, бу мубарек ибадетлернинъ максадыны да шойле беян буюра:



«Хадж иле умренинъ арасыны бирлештиринъ. Чюн-ки булар гунахны, тыпкъы кёрюгнинъ демирдеки тотны темизлемеси киби темизлер.» (Несан, Меназик, 6; Ибн-и Мадже, Меназик, 3)

Бойле бир маневий темизленмеге, янъыланмагъа ве иманны тазелемеге весиле олгъан ве хадис-и шерифте «хадж иле арасыны бирлештиринъ» деп тавсие этильген **«умре»** ибадети де чокъ муим.

Хадж - сенедде бир кере ве белли куньлерде ерине кетирилир. Анджакъ йылнынъ эр анги вакътында ве истенильгени къадар япылмасы мумкюн олгъан «умре» ибадети, чокъ фазилетли олгъаны ичюн «кучюк хадж» оларакъ табир этилир. Бу ибадетнинъ фазилетини эйи анъламакъ керек.

Бу себепле Пейгъамбер Эфендимиз -саллаллаху алейхи ве селлем-, умре ичюн изин истеген Азрети Умерге:

«Къардашчыгъым, бизни де дуанъда анъ, бизлерни унутма!» буюрды. (Тирмизи, Деават, 109/3562)

Азрети Умер -радиаллаху анх- Пейгъамберимизнинъ бу ильтифаты къаршысында:

«Расулуллах -саллаллаху алейхи ве селлем-нинъ бу сёзюне къаршылыкъ манъа дюньяны берсе эдилер бу къадар севинмез эдим»-, деген эди. (Эбу Давуд, Витир, 23/1498)

Бу орынек, умре ибадети эснасында япылгъан дуаларнынъ, башкъа вакъытларда япылгъан дуалардан даа макъбул олгъаныны косътермекте. Демек ки, умре ибадети эснасында япылгъан самимий ялварышларнынъ чокъ буюк бир севабы бар.

Хадждан сонъ, хусусан мубарек Рамазан айында япылгъан умре, маневий темизленменинъ энъ буюк ве-



силесидир. Пейгъамбер Эфендимиз -алейхиссаляту вес-селям- хадис-и шерифлеринде Рамазан айында япылгъан бир умре акъкъында, менимнен япылгъан бир хадж ки-бидир, буюрды. (Бкъз. Бухари, Умре, 4; Мюслим, Хадж, 221)

Хадж ве умре ибадетининъ гъаеси, буюк савап къазанып, маневий темизленюв олгъаны ичюн Хиджаз¹⁹ ёл-джулары шу хусускъа да дикъкъат этмелери керек:

4. Харам ве шубели шейлерни ташлап, Харам-и Шерифке эдеп ичинде кирмек ве диний аляметлерге сайгъы косътермек:

Энъ башта, бутюн ибадет ве хайыр ишлер эял къазанчнен япылмасы керек. Чюнки бу ибадетлерден алы-наджакъ зевкъ, беденнинъ эял гъыда иле бесленмеси шартынен мумкюндир. Хадж ве умре ибадетинде эял къазанчнынъ эмиетини ифаде эткен шу хадис-и шериф не къадар ибретли:

«Ким бу Кябени, харам ёлдан къазангъан акъчанен зиярет этсе, Аллаһкъа итаат этмектен чыкъкъан сайылыр. Бойле бир инсан, хаджгъа ниет этер, ихрамгъа сарыныр, девесине минер ве оны арекет эттирип: «Леббейк Аллаһумме леббейк» дерсе, семадан бир сес онъа шойле дер:

«Санъа не леббейк²⁰, не де садейк²¹! Чюнки сенинъ къазанчнынъ харам, ашынъ харам, минген айванынъ харамдыр. Ич бир савап алмадан гунахкъар оларакъ къайт! Бегенмейджек шейнен къаршылашаджагъынъ ичюн ке-дерлен!»

Факъат киши эял паранен хадж ёлджулыгъына чыкъар, девесине минер ве оны арекет эттирип, «Леб-

19 **Хиджаз** – Мекке ве Медине шеэрлерини ичине алгъан ви-ляетнинъ ады.

20 **Леббейк** – Буюр Аллаһым! Эмиринъе теслим олдым ве азырым!

21 **Саадейк** – бахт ве сеадет узъре ол, манасына кельген дуа сёзю.



бейк Аллаһумме леббейк» дерсе, семадан бир сес онъа шойле дер:

«Леббейк ве са'дейк! Санъа джевап бердим. Чюнки сенинъ минген айванынъ эял, урбанъ эял, ашынъ эялдир. Ойле исе чокъ буюк севаплар къазанып, гунахъа кирмейип къайт! Сени мемнюн ве севинчли этеджек шейнен къаршылашаджагъынъ ичюн севин!»» (Хейсеми, III, 209-210)

Хадис-и шерифтен анылашылгъаны киби, харам паранен хаджгъа барып, ялынъыз агъызынен «Леббейк» деген инсанларнынъ «Ля Леббейк»тен башкъа насипле-ри ёкъ.

Онынъ ичюн хаджда биринджи шарт - эял къа-занч. Ондан сонъ да самимий бир гонъюль... Зира тиль-ден тёкюльген эр «Леббейк» сёзю, яни «Буюр Аллаһым! эмирине теслим олдым ве азырым!» ифадеси, гонъюль-ни ашкънен багълайджакъ бир муаббет ичинде олмалы. Иште бойле гонъюльден юксельген «Леббейк» седалары, къулны Аллаһкъа якъынлаштырыр. Анджакъ къуру ве бош сёзлернинъ ич бир укму ёкъ. Бунынъ ичюн Пей-гъамберимизнинъ торуны Азрети Хусеин -радиаллаху анх-, «Леббейк» дегени вакъыт:

«Я Аллах манъа «Ля леббейк» къаршылыгъыны берсе!»- деп къоркъудан сарарып къала экен...

Хадж эснасында базы харамлардан исрарнен са-къынмакъ керек. Аллах Таала шойле буюра:

«Хадж, белли айлардадыр. Ким о айларда хадж-гъа ниет этсе (ихрамына сарылса), хадж эснасында рефес - къадынгъа якъынлашмакъ, фусукъ - гунах сайылгъан арекетлерге ёнельмек ве джидаль - къав-гъа этмек ёктыр. Не хайыр ишлесенгиз, Аллах оны билир. Бир де (хадж сеферине етеджек микътарда азыкъ топланъ. Мухакъкакъ ки, азыкънынъ энъ ха-йырлысы (тиленмектен, инсанларгъа юк олмакътан)



къачынмакътыр. Эй, акъыл саиплери! Менден къоркъунъ.» (эль-Бакара, 197)

Бу манада **рефес, фусукъ** ве **джидалъ**, яни джынсий арзулар, гунах ве мунакъаша киби билинген ясакълардан башкъа, Аллахнынъ къулларыны ынджытмамакъ хусусына да чокъ дикъкъат этмек керек. Чюнки о ерлерде о къадар чокъ инсан бир арагъа топлана ки, хаджылар эр ан бири-бирини ынджытмалары мумкюн. Бундан сакъынмакъ ичюн, хусусан таваф эснасында, эдеп ве незакетке чокъ дикъкъат этмек керек. Таваф эткенде, дёнюш джерьянына терс юрьмектен сакъынмакъ керек.

Айрыджа Харем-и Шерифнинъ къалабалыкъ ерлеринде ве мусафирханелерде, кириш ве чыкъышларда тертип ичинде олмакъ керек. О ерде бир от копармакъ биле ясакътыр, бунынъ ичюн къаба ве серт арекетлернинъ ерине бири-биримизге севги, мерхамет, урьмет ве незакет косътермелимиз. Зира о ерлерде ишленген къабаат ве гунахлар да, хайырлы амеллер киби къат-къат бери-леджегини унутмамакъ керек.²²

Бу инджеликлер, мерхамет ве незакет мисали Расули Экрем -саллаллаху алейхи ве селлем- Эфендимизнинъ чокъча дикъкъат эткен муим инджеликлердир. Бу себеппе Пейгъамбер Эфендимиз -саллаллаху алейхи ве селлем- бир кунъ Азрети Умер -радиаллаху анх-къа деди ки:

«Эй Умер! Сен кучълю-къуветли бир адамсынъ. Хаджер-и Эсведге эришейим деп инсанларны итеклеп, сыкъыштырма ве зайыфларгъа да зорлукъ япма! Не раатсыз ол, не де раатсыз эт! Эгер огюнъи бош коръсенъ Хаджери Эсведни селямла ве опъ, эгер бош дегиль исе узакътан опъме ишарети яп, келимеи тевхид окъуп, тек-бир кетирип янындан кеч!» (Хейсеми, III, 241; Ахмед, II, 28)

Бир кере Азрети Умер -радиаллаху анх- Кябе-и Муаззамагъа хитап этип, шойле буюрды:

22 М. Джемаледдин эль-Къасыми, *Зубдет-уль Ихъя*, Истанбул. 1969, с. 94.



«Сен не буюксинъ (эй Кябе!). Сенинъ шанынъ не юдже. Факъат керчек бир мумин къулынъ Аллаһ къатында шерефи сенден де устюндир.» (Тирмизи, Бирр, 85)

Бойледже, къул акъкъына ве гонъюль ынджытмамагъа дикъкъат этювден башкъа, о мубарек мекаянларда эдепли олмагъа тырышмакъ керек. Зира хадж ве умрининъ бир гъаеси де, о мубарек мекаянларгъа урьмет косъ термек ве о мукъаддес ерлернинъ азиз хатыралары иле джошып, гонъюллерге Аллаһ къатында дередже къазандырмакъдыр. Ает-и керимеде:

«...Эр ким Аллаһнынъ нишанларына (диннинъ аляметлерине) тазим косътерсе, шубесиз бу, къальплернинъ такъвасындандыр.» (эль-Хадж, 32)

Демек ки намаз, джами, Къуран-и Керим, эзан, Кябе, Сафа ве Мерве тёпелери киби нидже мукъаддес ерлер ве къаврамлар, эписи Аллаһнынъ бирер шиары укмюнде. Хадж ве умреде буларгъа урьмет этип, тазим косътермек керек.

Кабеге догъру аякъ узатаракъ отурмакъ я да ятмакъ, бош лафлар япмакъ, Къуран-и Керимни сайгъысыз бир шекильде окъумакъ ве оны ерге къоймакъ киби гузель олмагъан арекетлерден сакъынмакъ керек.

Башкъа тарафтан, о мубарек топракъларда, хасталангъан, ёлда къалгъан, имкянларыны я да якъынларыны гъайып эткен, яни мушкюль алгъа тюшкен мумин къардашларымызгъа ярдымджы олмамыз керек. Бу, айны заманда мумин бир гонъюльнинъ саип олмасы керек олгъан устюн сыфатлардандыр. Гонъюллернинъ иляхий бир къыймет ташыгъаныны тюшюнип, къальп къырмамагъа тырышмакъ керек. Аксине мумкюн олгъаны къадар гонъюль къазанмагъа гъайрет этмек керек.

Ибадетлернинъ ве хусусан хадж ибадетининъ акъикъатына анджакъ темиз ве хассас къальппен къавушмакъ мумкюн олгъаныны Мевляна Джелаледдин Руми шу икяесинен не гузель ифаде эте:



«Умметнинъ буюклеринден Байезиди Бистами хадж ве умре ичюн Меккеге кетеркен, ёлда кечкен бутюн шеэрлерде салих инсанларны араштыра эди:

«Бу улькеде басирет саиби, гонъюль козю ачыкъ ким бар?»- деп сорай эди. Чюнки не ерге кетсе кетсин, башта Аллахнынъ якъын къулларыны кыыдырып тапмакъны зарур коре эди. Аллах Таала:

«... **Шаёт бильмесенъиз, зикир эхлинден соранъ!..**» (эль-Энбия, 7) буюра. Муса -алейхисселям- биле ледунни илимге саип Хызырны зиярет эткен эди.

Байезид, велилернинъ руханийетини озюнде топлагъан узун бойлу бир ихтияр коръди. Козълери дюньягъа кёр, къальби исе, кунеш киби ышыкъ сача эди.

Байезид, о шейхнинъ къаршысына отурды. Ихтияр онъа:

«Эй киши, не ерге кетесинъ? Гъурбет эшьясыны (яни беденини) не ерге ташийсынъ?» деди.

Байезид де:

«Хаджгъа кетмек ниетиндем; эки юз дирхем де акъчам бар», - деди.

Ихтияр деди ки:

«Эй киши! О дюньялыкъ малынъдан бир микъдарыны Аллах ёлунда мухтаджларгъа, гъариплерге ве бичарелерге дагъыт! Оларнынъ гонъюллерине кир ве оларнынъ дуаларыны ал; бойледже рухнынъ уфукъы ачылсын! Олюм олмагъан бир омюрге къавуш! Башта гонъюлинъ хадж этсин! Ондан сонъ темиз бир гонъюлнен о назик хадж ёлджулыгъынъа девам эт!..

Чюнки Кябе, Аллахнынъ «хане-и бирр»идир. (Яни къулны иманнынъ текмилештирген ве Аллахкъа якъынлаштыргъан бир рахмет мекаяндыр.) Бу эвнинъ зиярет этильмеси, Исламнынъ шартларындан бири оларакъ фарздыр. Лякин инсан къальби, бир сыр хазинесидир.



Кябе, Азер огълу Ибрахимнинъ къургъаны бинадыр. Гонъюль исе, «Джелиль»²³ ве «Экбер»²⁴ олгъан Аллаһнынъ назаргяхыдыр.

Эгер сенде басирет бар исе, гонъюлинъдеки Кябени таваф эт! Таш-топракътан япылгъан Кябенинъ асыл манасы гонъюльдир. (Яни Кябе весилесинен гонъюльнъ Раббине даа якъын олур.)

Аллаһ, корюнген ве билинген Кябени таваф этювни, кирден темизленген ве арынгъан гонъюль Кябесини къазансын деп санъа фарз къылгъандыр.

Шуны эйи биль ки, хадж - япылмасы меджбурий бир иляхий эмирдир. Лякин шунъа да дикъкъат эт ки, сен Аллаһнынъ назаргяхы олгъан бир гонъюльни ынджытырсанъ, Кябеге джаяв оларакъ кетсенъ биле, къазанаджагъынъ севап, гонъюль къырмакънынъ гунахыны къапатмагъа етмез!»

Байезид, къартнынъ бу насиатларыны къаврап алды. Гонъюли, мерхаметнинъ сырындан бир пай алды. Сеадет ве раатлыкъ ичинде хадж ёлджулыгъына девам этти.»

Бу ве бенъзери гузель мисаллернен гонъюллерге ёл косътеген Азрети Мевляна, о мубарек топракъларгъа кетеджек олгъанларгъа шойле буюра:

«Хадж вакъыты кельгенде Кябе-и Муаззаманы зиярет ве таваф этмек ичюн бар! Бу макъсатнен кетсенъ, Меккенинъ акъикъатыны корерсинъ!»

Азрети Мевлянанынъ икяесинде хаджны мисаль бермеси, хаджнынъ чокъ назик бир ибадет олмасындандыр. Онынъ ичюн хадж ёлджулыгъына рухумызны азырлап чыкъмалымыз.

Бу анълайыштан узакъ бир суретте япылгъан хадж ве умре, умют этильген нетидже ве файданы бермез. Бу нокъта-и назардан хадж ве умре, хассас къальпнен ерине кетирильмели. Яни бу ибадет, бем-безя ихрам урбалары

23 **Джелиль** – Буюк, улу. Аллаһ Таалаынынъ сыфаты.

24 **Экбер** – даа буюк, энъ буюк.



ичинде мелеклернинъ гузеллигинден иссе алма гъайрети-дир. Бунинъ ичюн ихрамлы экенде ав этмек ясакъ, бир от, атта къастнен бир къыл биле копармакъ ясакътыр. Ихрамгъа киргенлерге, белли бир вакъыт ичюн базы элял шейлер ясакълана, шубели ве арамлардан не къадар узакъ турмакъ кереклиги акъкъында тюшюнмели. О ерлерде Яратыджыгъа севгиден яратылгъанларны севмек ве шефкъат, мерхамет ве незакет косътермек, бильхасса гонъюллерни къырмагагъа дикъкъат этмекнинъ зарур олгъаныны анъламакъ керек.

Эм хадж, эм умреде энъ муим иш, сайылы нефеслерни ве худутлы заманны энъ къыйметли вазифелерге бермек керек. Бунинъ ичюн де керексиз ишлернен, башкъаларнынъ алларынен огърашмакънен, вакътымызны бош ерге зиян этмектен сакъынмакъ керек. Зира хадж ве умредеки алымыз, къальбимизнинъ хассасиетини ве маневий дуйгъуларымызнынъ теренлигини косътерир.

Муминлернинъ, дин къардашларыны кучюксинмек, айыпламакъ ве пахыллыкъ арекетлери олмамалы. Чюнки о ерлерде кимнинъ не олгъаны билинемез. Къальплернинъ севиеси, инсанлардан сакълы, Аллаһкъа малюм-дир.

Халид-и Багъдадийнинъ тасаввуф ёлуна кирмеден эвель яшагъан шу адисе, не къадар маналы:

Халид-и Багъдадий хадж ичюн ёлгъа чыккып, Медине-и Муневвереге кельгенде нур юзлю бир инсангъа расткелир. Йеменли бу Аллах достунынъ маневий джазибесине къапылып, ондан насиат истер. О зат да шойле дер:

«Эй Халид! Меккеге баргъанынъ вакъыт, эгер Кябеде эдепке терс бир шей корьсенъ, о инсан акъкъында ярамай тюшюнме ве кенди кендинъе янълыш бир укум берме! Козюнъи ве къальбинъи бундан узакъ тут! Ич дюньянынъ гузеллештирмекнен мешгъуль ол!»

Ильк бакъкъанда къапалы бир тенби киби олгъан бу ифаде, керчекте, Халид-и Багъдадий иле оны асыл дере-



джесине алып бараджакъ маневий ходжасы арасындаки корюшювлерине ишарет эди.

Анджакъ Халид-и Багъдадий Меккеге баргъанджа о ернинъ маневий авасындан эджанланып, о затнынъ на-сиатыны унутты. Бир Джума куню, дагъыныкъ къыяфет-ли бир дервишнинъ Кябеге аркъа чевирип, онъа бакъып отурмасы дикъкъатыны чекти. Озь ичинден:

«Шу не гъафиль бир кимсе ки, эдепке терс тюшип, Кябеге сырт чевирди! Бу мубарек макъамнынъ юджели-гинден хабери ёкъ!»- деп тюшонди.

Бу эснада о зат, Халид-и Багъдадийге:

«Эй Халид! Бильмейсинъми, мумин инсангъа урь-мет, Кябеге урьметтен даа фазилетлидир. Чюнки къальп, назаргях-ы иляхийдир. Селим бир къальп - бейтуллах-тыр. Мединедеки о салих затнынъ насиатыны гонъю-линъде тут!..» деди.

Бу сёзлер къаршысында Халид, бу кимсенинъ буюк бир вели олгъаныны анълап, эллерине сарылды ве аф ти-леди:

«Эй салих киши! Манъа яхшылыкъ этсенъ не олур, мени талебеликке къабул эт!»- деп риджа этти. О дервиш уфукъларгъа бакъып:

«Сенинъ тербиенъ манъа аит дегиль! Сен Хин-дистаннынъ Джиханабад шеэринде яшагъан Абдуллах Пир-и Дехлевиининъ тербиесинде оладжакъсынъ! Аллаһ муваффакъ этсин!..»- деди ве орталыкътан гъайып олды.

Бу икяени анъламакъ ичюн мерхум бабам Муса Эфендининъ шу насиатларыны накъыл этейим:

«Хаджгъа кеткенлерге тенбилерим шу; хушуны ихмал этменъ. Кенди къальп дюньяньызнен мешгъуль олунъ, манасыз лафларгъа далманъыз. О ерлернинъ ма-невий авасындан файдаланмагъа бакъынъ.



Хаджгъа кеткендже де инсаннынъ кендиси дуй-мадан, руханиети артар. Буюк хайыр хызметлер эткенлернинъ эксериети, дефаларджа хадж эткенлердир. Хаджнынъ маневий кучюнен мерхамет ве шефкъат дуйгъулары къуветленир. Бойле кимселернинъ эм гонъюли, эм де эли ачылыр. Иман лезети ве эеджаны ичинде энъ севген шейлерден колайлыкънен ве севе-севе Аллаһ ёлунда инфакъ²⁵ этерлер.»²⁶

Ает-и керимеде:

«Севген шейлеринъизден (Аллаһ ёлунда) ардж-ламагъанджа «бирр»ге пришалмазсынъыз. Эр не инфакъ этсенъиз, Аллаһ оны хакъкъы иле билир.» (Ал-и Имран, 92) буйрула.

Бундан сонъра бутюн меселе,

5. Озь ираденыи Аллахнынъ ризасына къурбан этмек:

Хадж ибадетинде къурбан соймакътан асыл макъсат, Азрети Ибрахим ве Азрети Исмаил -aleyхисселям-нынъ теслимиетлерини хатырлап, олардаки иляхий икметлерден насип алмакъ ве Аллаһкъа ихляс ве такъва иле къуллукъ этмектир. О ерде ирадесини Аллахкъа теслим эткен ве иляхий ашкъ атеши иле туташкъан дервиш киби олмакъ керек. Бу себепле Аллаһ буюрыр:

«(Къурбанларнынъ) не этлери, не де къанлары Аллаһкъа етишир. Аллаһкъа етишкени, анджакъ синъинъ такъванъыз...» (эль-Хадж, 37)

Азрети Ибрахим -aleyхисселям- огълуны феда этти; огълу Азрети Исмаил -aleyхисселям- да джаныны ортагъа къойды. Биз нефсимизни ве малымызны Аллаһ ёлунда не къадар сарф эте билемиз? Ает-и керимеде буйрулгъан; **«Джанлары ве маллары къаршылыгъында**

25 **Инфакъ** – Аллаһ ёлунда малыны ве джаныны арджламакъ.

26 Аллаһ Достунынъ Дюньясындан, Истанбул 1999, с. 112.



дженнетни сатып алгъан муминлер»²⁷ дереджесине не къадар ляйыкъмыз?

Иште бунынъ ичюн омюр бою узеримизде бир ва- зифе бар:

6. Шейтанны ве нефисни ташкъа тутмакъ:

Юкъарыда ифаде эткенимиз узьре **шейтангъа таш атмакъ**, даа зияде ичтеки шейтангъа таш атмакънен башлар. Бу, Азрети Ибрахим, Азрети Исмаил ве Хаджер анамызнынъ, шейтанны къувып, оларгъа берген весвесе- лер себебинен таш атмаларынынъ хатырасыдыр.

Эр заман кендимизни эсаптан кечирмемиз керек; ичимиздеки весвеселерге, шубелерге ве хаталаргъа не къадар таш атып, оларны не къадар къувалая билемиз? Ибрахим -алейхисселям-, Хаджер анамыз ве Исмаил - алейхисселям-нынъ шейтанны ве нефислерини ташкъа туткъанлары анда ихлас ве самимиетлеринден биз не къадар насиб ала бильдик? Бу аллар бизни не къадар дуйгъуландыра?

Хадж ве умреге инсанны бардыраджакъ севие шу- дыр:

7. Девамлы Аллахкъа дуа ве зикир алында ол- макъ:

Аллаһ Таала буюра:

«... Арафаттан айырылып тюшкенинъизде, Ме- ш'ар-и Харамда Аллаһны зикр этинъ ве Оны, сизге косьтерген шекильде, анъынъ. Шубесиз, сиз даа эвель анълыш кеткенлерден эдинъиз.» (эль-Бакара, 198)

«Хадж ибадетлеринъизни битиргенинъизнен, бабаларынъызны анъгъанъыз киби, атта ондан даа къуветли бир шекильде, Аллаһны анъынъ. Инсан- лардан ойлелери бар ки: «Эй, Раббимиз! Бизге дюнь- яда бер», дерлер. Бойле кимселернинъ ахиреттен ич насиби ёкътыр.» (эль-Бакара, 200)

Акъикъатен хадж ве умреде бол-бол кетирильген тельбиелер²⁸, инсанны девамлы зикир ве дуа алында тутмакътадыр.

Расулуллах -саллаллаху алейхи ве селлем- шойле буюра:

«Тельбие япкъан ич бир мусульман ёкътыр ки, онынъ сагъ ве сол тарафында олгъан ташилар, тереклар ве топракъ онынънен берабер тельбие этмесин. Бу тельбиеде булунув (сагъ ве сол тарафларыны косътерип) шу ве шу истикъаметте ернинъ эр тарафында девам этер.» (Тирмизи, Хадж, 14/828)

Зикир ве дуа алы къальпте эйи ерлешмеси ичюн тельбие пек муимдир. Бунынъ ичюн фердий²⁹ ибадетлернинъ чогуу сессиз олмасына рагъмен тельбие юксек сесле кетирилир. Бойледже къул, эм озюни, эм де этрафыны къальп ве беден аэнки ичинде зикир ве дуа иле мешгъуль эте.

Бу себепле Фахр-и Кяинат Эфендимиз шойле буюрды:

«Джибриль -алейхисселям- манъа келип, асхабыма ве менимнен берабер олгъанларгъа, тельбиени юксек сеснен кетирмемизни эмир этти.» (Эбу Давуд, Менасик, 26/1814)

Пейгъамбер Эфендимиз -саллаллаху алейхи ве селлем- бу мубарек меянларда инсанларнынъ дуа ве зикирнен мешгъуль олмалары ичюн лаф этмекни биле шойле худутлагъан эди:

«Бейтуллах этрафындаки таваф - намаз кибидир. Анджакъ бу ибадет эснасында лаф этмек мумкюндир. Ойле исе, ким таваф сырасында лаф этсе, тек хайырлы сёзлер сёйлесин!» (Тирмизи, Хадж, 112)

28 **Тельбие** – Хадж эснасында «Леббейк Аллаһумме леббейк, леббейке ля шерике леке леббейк. Иннель хамде вен-ниъмете леке ве-ль мульк. Ля шерике лек!» ифадеси.

29 Фердий - тек башына этильген.



Сайгъанымыз темеллерни ерине кетирильмеси нетиджесинде:

8. Гонъюльнинъ иляхий афкъа ве муяфаткъа мувафыкъ олмасыдыр:

Хадис-и шерифте буюрыла:

«Бир умре, дигер умреге къадар япыладжакъ гунахларнынъ кефаретидир. Хадж-ы Мебрурнынъ къаршылыгъы исе дженнеттир!» (Бухари, Умре, 1)

Мекке ве Мединеге баргъан эр муминнинъ арзусы, хадж ве умре ибадетини текмиль оларакъ ерине кетирип, анадан догъгъан киби гунахсыз оларакъ эвине дёнмектир. Бу иляхий лютфке лайыкъ олмактыр.

Расулуллах -саллаллаху алейхи ве селлем- шойле буюра:

«Эр ким, шу Кябе-и Муаззамагъа хадж ниетинен келип де, гунах ве рефес ишлемеден хаджыны ерине кетирсе, анасындан догъгъан киби гунахсыз, тер-темиз оларакъ эвине дёнер.» (Муслим, Хадж, 438)

Шубесиз бу яхшы хабер, мебрур бир хадж япкъан, яни хаджлары баштан сонъунаджа гузеллик ве фазилетле толу олгъан муминлер ичюнدير.

Хадис-и шерифлерде сёйленгени киби, макъбул ве мебрур бир хадж нетиджесинде **«къул акълары»**ндан башкъа бутюн гунахлар афу этилир. Афнынъ саиби Аллаһтыр. Анджакъ, башкъа инсанларгъа къаршы акъларынынъ эсабы къыямет куню корюледжектир.

Бунынънен берабер, хаджда гунахларнынъ афу этилджегини догъру анъламакъ керек. Чюнки кишининъ къылмагъан намазы, тутмагъан оразасы ве бермеген зекятлары бу афнынъ ичине кирерми, киремзи - биз бильмеймиз. Мумин, омюр боюнджа бу борджларны ерине



кетирмеге тырышмалы. Ерине кетирильмеген ибадетлерден къул эки чешит месулиет ташыр:

1. Ерине кетирмемекнинъ месулиети.

2. Вакътында этильмейип, сонърадан къаза этсе биле юкленген месулиет.

Аллаһ, хадж нетиджесинде намаз, ораза ве зекятларыны къазагъа быракъманынъ гунахыны афу этер. Амма о къазаларны ерине кетирмектен кене де месуль къалмакътамыз. Бунунъ ичюн къаза намаз ве оразалар мытлакъа ерине кетирильмели, вакътында берильмеген зекятны да о заманки алына коре эсаплап берильмеси зарурдыр. Эм де буларны вакътында ерине кетирмегенинъ ичюн де Аллаһ Таалаядан афу тилемек керек.

Бу юздендир ки, хаджгъа кеткенлерге, бар исе борджларыны одемелери, узерлеринде акъкъы олгъанлардан эяллыкъ алмалары, къазагъа къалгъан намаз, ораза ве зекатларыны бир ан эвель эда этмелери тембих этилир.

Эгер де инсан бутюн омюри боюнджа ибадет борджларыны бермеге гъайрет этти, амма берип оламады исе -иншааллах- Раббимиз оны афу этер. Хадждан сонъ бутюн гунахлар афу этильди деп ибадет борджларыны ве къул акъларыны ихмал этмейип, бу мевзуда гъайрет косьтермек керек. Ама бутюн гъайретлеримизге рагъмен кене де эксик къалгъанлар олса, олар ичюн Аллаһтан афу тилеп, мерхаметине сыгъынмакъ керек.

Къабул этильген бир хаджнынъ бир алямети даа, кишининъ хадждан сонъраки яшайышынынъ Аллаһнынъ ризасына уйгъун олмасыдыр. Мумин, хаджда бутюн гунахлары афу этильгенине ишанып,



дикъкъатсызлыкъ япмамалы, бу дюньянынъ имтихан дияры олгъаныны асла унутмамалы. Чюнки пейгъамберимиз: «Базы кишилер бар ки, дженнетке бир адым къалгъанда -Аллаһ къорчаласын- джеэннемлик олурлар»- деп буюра.³⁰ Инсанлыкъ тарихы бойле имандан дёнмек адиселеринен толудыр.

Бунунъ ичюн мумин, къоркъу ве умют арасында яшамалы, ве Аллахнынъ **«Санъа олюм кельгенге къадар Раббинъе къуллукъ эт!»** (эль-Хиджр, 99) эмирини озюне аят принципи оларакъ сайламасы керек.



Ляйыгъынен ерине кетирилген хадж, яни хадж-ы мебрур, иляхий афудан башкъа къулгъа: месулиет, афу этиджилик, къальпни ве беденни эп темиз тутмакъ, Ислам къардашлыгъы, устюнлик анджакъ такъвада олгъаныны анъламакъны, элял къазанч, тевеккуль, теслимиет ве ихляс киби маневий табиятларны ве гузелликлерни де къазандырыр. Хаджнынъ дюнья ве ахирет къазанчлары буларнен сынъырлы дегильдир.

Хаджнынъ мумин къулларгъа энъ муим файдасы, башта Аллахнынъ ризасыдыр. Бундан башкъа, дюньянынъ дёрт бир янындан кельген мусульманлар арасында севги, муаббет ве самимиетнинъ пейда олмасыдыр. Чюнки хадж, Аллахнынъ сонъсуз рахмет, афу ве магъфирет авасы ичинде кечкен ве мусульманларны терен иман эеджанынен къайнаштыргъан мубарек бир ибадеттир. Хаджда чешитли мемлекетлерден, тиллери ве ренклери фаркълы, яшайыш, урф-адетлери айры нидже инсанлар, Кябенинъ этрафында аджайип бир бирлик ичинде ибадетлерини ерине кетирирлер. О мекяндарда акъикъий му-



аббет ве дуйгъулар, бутюн фаний ве нисбий фаркъларны силер ве мусульманларны айны дуйгъуларнен чарпкъан тек бир юрек алына кетирир. Гонъюль бераберлигининъ сеадет ве севинч ичинде гузель бир дин къардашлыгъы яшаныр.

Бойледже Хадж - Ислямнынъ тек диний бир шарты оларакъ къалмайып, бу юдже диннинъ ахлякый, ичтимаий ве сиясий джеэтини къуветлендирген бир ибадеттир. Муминлернинъ аятларынынъ юксек бир абидеси оларакъ къаршымызгъа чыкъар.







مسجد النبي في المدينة المنورة
At Maghrib prayer - (The Prophet's Mosque)

МЕДИНЕ-И МУНЕВВЕРЕ³¹ ЗИЯРЕТИ

Хадж ве умре ибадетлерининъ башында я да сонъунда, Медине-и Муневвереді Расулуллах -саллаллаху алейхи ве селлем-нинъ къабирини зиярет этмек, къальпни иляхий муаббет нагъышларынен гузеллештирип, мертебелерге юксельтир.

Бунунъ ичюн Расулуллах -саллаллаху алейхи ве селлем-нинъ юдже хатыралары ве джан берген нефесинен толу о мубарек топракъларгъа баргъанда, Онынъ руханиетинден насип алмагъа тырышмакъ керек. Равза-и Мутаххараны³² зиярет эткенде бу мукъаддес топракънынъ къучагъында кяинатнынъ энъ юдже джевхерининъ яткъаныны эр заман акъылда тутмакъ керек. Онъа уммет олмакънынъ эеджаны ичинде, эдеп ве сайгъы косътерильмели.

Зира Расулуллах -саллаллаху алейхи ве селлем-шойле буюрды:

«...Ибрахим -алейхисселям- насыл Мекке-и Мукарремени харем къылды ве бу ерлер ичюн дуа этти, мен де

31 **Медине-и Муневвере** – Даа эвель Есриб адыны ташыгъан бу шеър, Пейгъамберимизнинъ кельмесинен «айдынлыкъ шеэри» манасына кельген бу аднен анъылмагъа башлады.

32 **Равза-и Мутаххара** – темиз багъча, Аз. Пейгъамберимизнинъ къабирине берильген ад.



Медине-и Муневверени харем къылдым...» (Бухари, Фезаилу'л-Медине, 6; Мюслим, Хадж, 462)

Равза-и Мутаххаранынъ Гъонджеси Севгили Пейгъамберимиз -саллаллаху алейхи ве селлем-ни джанларымыздан, малымыздан, эвлятларымыздан, яни эр шейден даа чокъ севмелимиз. Аллаһ онъа **«хабибим»**³³ деп ильтифат этти, бунынъ ичюн бу севгини умметине де эмир этти. Бу себепле къады Ияз -рахметуллахи алейх-, Тевбе суресинде кечкен:

«Де ки: Эгер бабаларынъыз, огъуларынъыз, къардашларынъыз, ханымларынъыз, хысым-акърабанъыз, къазангъан малларынъыз, кесаткъа огърамасындан къоркъкъан тиджаретинъиз, хошлангъан эвлеринъиз сизге Аллаһтан, Ресулинден ве Аллаһ ёлунда джихад этювден даа севимли исе, артыкъ Аллаһ эмрини кетиргенге къадар беклень. Аллаһ фасыкълар топлулыгъыны хидаетке приштирмез.» (эт-Тевбе, 24) ает-и керимесинден ёлгъа чыккып:

«Аллаһ, мусульманларгъа озюнден сонъ Расулуллах -саллаллаху алейхи ве селлем-ни севмекни фарз къылды»- демектедир.

Бир шейге дуюлгъан севги ве муаббет, бу муаббетке весиле олгъан я да онынънен багълы олгъан шейлерде акс этер. Месея, Ухуд дагъыны юзь бинълердже дагъдан айырып севимли япкъан, Расулуллах -саллаллаху алейхи ве селлем-нинъ онъа олгъан муаббетидир. Бунинъ ичюн Медине-и Муневвереге баргъанда Ухуд дагъына да муаббетнен бакъмакъ керек. Чюнки Эфендимиз -aleyхиссалату vessелям-: *«Ухуд бизни север, биз де Ухудны севермиз.»* (Бухари, Джихад, 71) буюргъандыр.

Медине-и Муневвере, хиджреттен эвель **«Есриб»** адында адий бир шеэр эди. Бу шеэрни **«Медине-и Муневвере»** япкъан ве бутюн умметке севимли эткен шей, онынъ Пейгъамбер Эфендимизнинъ шеэри олмасы ве Онынънен багълы зенгин хатыраларыдыр. «Медине-и

Муневвере»нинъ муминнинъ гонъюлинде ич бир шеэрле кыясланмайджакъ севги ве муаббетке саип олмасынынъ себеби, бу шеэрни аныгъанда Азрети Пейгъамберни хатырлатмасыдыр.

Бунынъ ичюн Аллаһны севмек, Пейгъамберимизни севмектен ве Онъа таби олмакътан кечмекте. Бу себепле Аллаһ:

«(Расулим!) Де ки: Сиз керчектен Аллаһны севе исенъиз манъа уюнъыз ки, Аллаһ да сизни севсин...»

(Ал-и Имран, 31) буюрды.

Демек ки, Аллаһ Расулине таби олмакъ ве Онъа муаббет дуймакъ, кишини Аллаһнынъ севген къулла-рындан олмакъ шерефине наиль этер. Бу себепле асхаб-ы кирам, Расулуллах -саллаллаху алейхи ве селлем-нинъ акъикъатына якълашмакъ ичюн Онынъ руханиети этрафында бирер кобелек киби дёнип, Онда фаний олун-ны дюньянынъ энъ буюк нимети бильдилер ве бунынъ ичюн Аллаһ оларны лютфине наиль этти. Бунынъ ичюн хаста ве гъафлет ичинде олгъан юреклеримизнинъ энъ кучлю иляджы, Расулуллахкъа дуюлгъан севги ве хайранлыкънынъ нетиджесинде Онынъ ёлуна кельмек, яни Онынъ «суннетине уймакъ»тыр.

Бойлеликле ич бир шей, Расулуллах -саллаллаху алейхи ве селлем-нинъ севгисининъ огюне кечмемели. Не эвимиз, не къорантамыз, не бала-чагъамыз ве не де ишимиз-тиджаретимиз!..

Пейгъамберимиз -саллаллаху алейхи ве селлем-мерхаметли бир ананынъ эвлядына олгъан севгисинден даа буюк бир муаббетнен умметине къол-къанат керип, омюри боюнджа да; «Умметим, умметим...» деп яшагъандыр.



Эфендимиз -aleyхиссаяту vessелям- асхабына шойле буюрды:

«Диккъат этинъ! Мен яшадыгъым муддетче сизинъ ичюн бир эминлик весилеси оладжам. Вефат эткен сонъ да, къабримде: «Я Рабби, умметим умметим!..» деп ильк Сур³⁴ уфленинджеге къадар нида этеджем...» (Али эль-Мюттаки, Кензю 'л-Уммал, дж. 14, с. 414)

Акъикъатен «Умметим, умметим...» диерек вефат эткен эди.

Сонъ нефесинде; *«Мен сизни кевсер хавузынынъ башында беклейджем...»* деп бизлерге олгъан муаббет, шефкъат ве мерхаметини ифаде этти.

Къыскасы Аллахнынъ:

«...сизге озюнъизден ойле бир Пейгъамбер кельгендир ки, сизинъ сыкъынтыгъа огъравынъыз Онъа чокъ агъыр келир. О, сизге чокъ федакяр, му'минлерге нисбетен чокъ шефкъатлыдыр, мерхаметлидир.» (эт-Тевбе, 128) буюргъаны узъре, Пейгъамберимиз -саллаллаху алейхи ве селлем-нинъ аяты боюнджа агъламасы, кульмеси, кедерленмеси, севинмеси, дуа ве ялварувлары, эп бизлер ичюн яни уммети ичюн олды. Атта Мираджджи киби хусусий бир анда дахи бизлерни тюшюнди ве бизлер ичюн чырпынды...

О, ойле бир рахмет дерьясыдыр ки, Онынъ урьметине; зулум, ширк ве исян девиринде биле Меккеге коклерден бир бея ягъмады, бир мусибет кельмеди. Иляхий интикъам корюнемди. Чюнки ичлеринде Азрети Пейгъамбер -саллаллаху алейхи ве селлем- бар эди. Бу керчекни Аллах Таала шойле ифаде эте:

«(Эй Расулим!) Сен оларнынъ ичинде экенде Аллах, оларгъа азап этеджек дегильдир!..» (эль-Енфал, 33)

34 Сур – Мелек Исрафилъ Сур денильген бир алетке уфюреджек ве Къыямет куню башлайджакъ. Биринджи уфюрювде эр шей ёкъ оладжакъ, экинджи уфюрювде исе эр шей тириледжек.

Анджакъ Эфендимиз -саллаллаху алейхи ве селлем- Меккеден Мединеге хиджрет этиндже вазиет денъишти. Мушриклерге семадан белялар энмеге башлады. Буюк бир берекетсизлик ве кыятлыкъ яшанды. Кокке бакъсалар козьлери къарара эди, ачлыкътан башлары айлана эди.

Бу демектир ки, кимнинъ гонъюлинде Азрети Пейгъамберге муаббет ве севги ер алды исе, Аллаһ о гонъюлге азап этмейджектир. Мушриклерге биле Онынъ урьметине мерхамет эткен Аллаһ, эльбетте Оны севген, Онынъ ашкъыны къальбинде ташыгъан ве Онынъ Суннетинден айрылмагъан кимсени ич атешинде якъармы? Анджакъ киминъ гонъюлинде де О Хидает кунеши ёкъ исе, эльбетте азаптан къртулмайджакътыр.

Омюри боюнджа бизни тилинден ве гонъюлинден ич бир заман тюшюрге Пейгъамберлер Султаны -саллаллаху алейхи ве селлем- Эфендимизге айны ашкъ ве муаббетни косьтермек, Онъа уммет олмакъ шерефине наиль олгъан эр мусульманнынъ биринджи вазифесидир.

Факъат бу севги, ялынъыз «гонъюлимде» демекнен оладжакъ шей дегильдир. «Севген киши, севгенини такълит этер ве оны чокъча анъар.» Бунынъ ичюн Пейгъамберимизни севгенлернинъ алямети, эр ал ве арекетлеринде Онынъ ёлуна уйып, онынъ ал ве арекетлерини акс этмелеридир. Бир де Онъа чокъча саяяватлар ве селямлар кетирмелеридир...

Имам Малик³⁵ дей ки: « Пейгъамберлер Султаны -саллаллаху алейхи ве селлем- Эфендимизнинъ шаны бу къадар юдже олмасы себебинен Онынъ къабри олгъан ер, Кябеден биле даа мукъаддестир. Чюнки бутюн кяинат, Онынъ урьметине яратылгъандыр».

Айрыджа, хадис-и шерифте Эфендимиз -саллаллаху алейхи ве селлем- шойле буюрды:

35 **Имам Малик** – (Хиджрий 93-179) йылларында Мединеде яшагъан буюк Ислам укьукъчысыдыр. Маликий мезхебининъ (къуруджысы) имамы.



«Мени вефатымдан сонъ зиярет эткен кимсе, сан-ки мени аятымда зиярет эткен кибидир!» (Даракутни, Су-нен, II, 278)

Анджакъ, бу зиярет эснасында эдепке риает этмек пек муимдир. Зира акъикъый манада бу зияреттен файдаланмакъ ичюн эдеп биринджи шарттыр.

Риваетлерге коре бир кунъ Имам Малик михрапта экенде, о девирнинъ халифеси Эбу Джафер Мансур джамиге кельди. Базы суаллер сорады. Араларында ильмий музакере башлады. Анджакъ, Эбу Джафер Мансур къо-нушманынъ эеджанына къапылып, сесини юксельтин-дже Имам Малик:

«Эй Халифе! Бу ерде сесинъни юксельтме! Зира Аллаһнынъ тенбихы сенден даа фазилетли инсанлар узерине энди...», -деп оны дикъкъатлы олмага чагъырды.³⁶

Бу юксек эдеп къаршысында Халифе:

«Эй Имам! Дуа эткенде къыблагъамы, ёкъса Расулуллахкъа дёнейимми?»- деп сорады.

Имам Малик шойле буюрды:

«Юзюнъни не ичюн Ондан чевиреджексинъ ки?! О, сенинъ ве атанъ Азрети Адемнинъ къыяметке къадар Аллаһкъа алып баргъан весилесидир. Аксине сен, Пейгъамбер Эфендимизге ёнель ве Онынъ шефаатыны исте ки, Аллаһ Таала да Оны санъа шефаатчы этсин!...»³⁷

Базылары бу акъикъатны дуймайып, хаджыларны Равзагъа дёндюрмезлер. «Селям бер ве кеч; къыблагъа дён!»- дерлер. Ойле исе, Расулуллах -саллаллаху алейхи ве селлем- хайй, яни тиридир. Зира насыл ки шехидлер-

36 Пейгъамберимизнинъ янында тартышып, юксек сеснен лаф эткен сахабилерни Аллаһ шу аетнен тенбиелей: «Эй, иман эткенлер! Сеслеринъизни Пейгъамберининъ сесинден юксельтмень. Бири-биринъизге багыргъанынъыз киби, Пейгъамберге юксек сеснен багырманъ. Ёкъса, сиз феркъына бармадан, амеллеринъиз бошуна кете берип.» зль-Фетх, 2.

37 Бакъынъыз Къады Ияз, *Шифа-и Шериф*, Бейрут 1404, дж. II, с. 596.

нинъ ольмейип, яшамагъа девам эткенлери бир акъикъат исе, оларнынъ усьтюнде олгъан Пейгъамберлернинъ ве хусусан Алемлернинъ Эфендисининъ де мустесна бир тирилик ичинде олгъаны мухакъкъактыр.

Абиде эс-Сельмани, «табиин»³⁸ неслининъ иле-ри кельген фыкъых ве хадис алимлеринден бири эди. Пейгъамбер Эфендимизнинъ вефатындан эки йыл эвель мусульман олды, факъат Оны корьмек бахтына эремеди. Абиденинъ шу сёзю, ильк мусульманларнынъ Эфендимизге дуйгъанлары севгини пек гузель анълата:

«Янымда Расулуллахнынъ бир сачынынъ булунмасы, меним ичюн дюньянынъ бутюн серветинден даа къыйметлидир.» (Ахмед, III, 256)

Намлы Ислам алими Зехеби де, Абиде эс-Сельманининъ Пейгъамбер севгисини косьтерген сёзлерини окъугъан сонъ, дуйгъуларыны шойле анълатыр:

«Расулуллахнынъ бир сачыны, инсанларнынъ саип олгъан бутюн алтын ве кумюшлерден устюн корьген Абиденинъ бу сёзлери, юксек нокътадаки бир муаббетнинъ мисалидир. О буюк алим, Азрети Пейгъамбернинъ вефатындан элли сене сонъра бойле сёйлеген олса, Онынъ вефатындан еди юз сене сонъра биз, Онынъ бир сачыны я да аякъкъабынынъ къайышыны, я да сув ичкен топракъ къабынынъ бир парчасыны тапсакъ, аджеба не сёйлемемиз керек?

Шаёт зенгин бир адам, серветининъ буюк бир къысмыны бойле бир шейни эльде этмек ичюн сарф этсе, сен онъа серветини сачып савургъан я да акъылсызджа пара арджлагъан кимсенинъ козюнен бакъарсынъмы?

Ёкъ, хайыр! Расулуллахнынъ мубарек эллеринен япкъан Месджид-и Небевини зиярет этмек, Онынъ азиз шеэринде Сеадет эвининъ ян тарафында Онъа селям бермек ичюн тапкъанынъны арджламакътан чекинме!

38 **Табиин** – Сахабе-и кирам девринде яшайып, оларнен ко-рюшкен инсанларгъа берильген ад.



Мединеге баргъанда Онынъ севгили Ухуд дагъына тоя-тоя бакъ ве оны сен де сев! Чюнки Ухуд дагъыны Азрети Пейгъамбер -алейхиссаяту vessелям- чокъ севе эди. Онынъ Равзасына бар, отурып тургъан ерлерге дефаларджа барып, рухунъы къана-къана тоюрмагъа гъайрет эт! Зира Кяинатнынъ Эфендиси олгъан О Затны джанынъдан, баланъдан, саип олгъанынъ эр шейден даа чокъ севмегендже текмилъ бир мумин оламазсынъ...» (Зехеби, *Сиеру Алам эн-Нубела*, IV, 42-43)

Ислам тарихынынъ сахабе ве табиин девринден сонъра энъ мухтешем девири олгъан Османлы императорлыгъы, падишахындан чобанына къадар бутюн халкъынынъ эшсиз бир Пейгъамбер муаббетинен яшагъан бир джемиет эди.

Месджид-и Небевининъ тамиринде эр ташны, абдестли оларакъ ве бесмеле иле ерине къойгъан Османлыларнынъ бу тамир эснасында Пейгъамберимизнинъ руханийетини раатсыз этмек ичюн чёкючлерине кече багълап чалышмалары мисли корюльмеген бирер эдеп ве урьмет нумюнесидир.

Кене Османлылар девринде **Медине-и Муневвереге** кельген **Сурре алайы**³⁹, шеэрге кирмеден, якъын бир ерде къонакъладылар, кендилерини Медине-и Муневверенинъ маневий авасына азырлагъан сонъ Расулуллахнынъ къабырине якълашкъан ве зиярет эткен эдилер. Дёнюшлеринде де мемлекетлерине шифа оларакъ Медине-и Муневверенинъ мубарек топрагъыны алып кеттилер.

Османлы падишахларынынъ сарыкъларынынъ уджундаки соргъучнынъ бир сипиртки темсили олгъаныны аджеба ким билир? Бунынънен Хареми Шерифнинъ сипирткиджиси олгъанларыны косътермекте эдилер. Харамейнинъ сипирткиджилерининъ айлыкъларыны да озъ серветлеринден бере эдилер.

39 **Сурре алайы** – Османлы девлетинде Хиджазгъа йиберильген къыйметли эдиелерни алып баргъан эйет.

Бу манада шаир Набининъ 1678 йылында девлет адамлары иле берабер чыкъкъан хадж сеферининъ хаты-расы пек ибретли:

Наби, о ёлджулыкъта бир пашанынъ аягъыны гъаф-летен Медине-и Муневвереге догъру узаткъаныны корер. Бундан чокъ тесирленип, мешур наатыны⁴⁰ язмагъа баш-лар.

Саба намазына якъын ёлджулар Медине-и Мунев-вереге якълашкъанда, Наби язгъан наатыны Месджид-и Небевийнинъ минарелеринден окъунгъаныны дуяр:

*Сакъын терк-и эдебден къуй-и махбуб-и Худадыр
бу;*

Назаргях-ы иляхидир, макъам-ы Мустафадыр бу!..

«Аллаһнынъ назаргяхы ве О'нынъ севгили Пейгъам-бери Азрети Мухаммед Мустафа -саллаллаху алейхи ве селлем-нинъ макъамы ве ери олгъан бу ерде эденке риа-етсизлик этмектен сакъын!..»

*Мураат-ы эдеб шартыйла гир Наби бу дергяха,
Метаф-ы къудсиянъдыр, бусегях-ы Энбиядыр бу!..*

*«Эй Наби! Бу ерге эдеб къаиделерине уйып кир! Бу
ер, мелеклернинъ кобелек дайын этрафында дёнгени ве
Пейгъамберлернинъ къапысыны опытиги мубарек бир
макъамдыр.»*

Бу вазият къаршысында чокъ эеджанлангъан Наби, аман муеззинни тапып:

«Бу наатны кимден ве насыл огрендинъиз?»- деп сорар.

Муеззин:

«Бу гедже Аллаһ Расулы -саллаллаху алейхи ве сел-лем- руямызда бизге:

«Умметимден Наби исимли бир шаир мени зиярет-ке келе. Бу зат манъа сонъ дередже ашкъ ве муаббетнен

⁴⁰ Наат – Азрети Пейгъамберни макътап айтылгъан, онъа дуялгъан севгини тильге кетирген шиирлер.



толу. Бу ашкъ себебинен оны Медине минарелеринден озъ наатынен къаршыланъ!..» буюрды. Биз де Пейгъамберимизнинъ бу эмирини ерине кетирдик...» дер.

Наби, окюр-окюр агъламагъа башлар. Эм агълар, эм де шойле дер:

«Демек ки, Аллаһ Расули -саллаллаху алейхи ве селлем- манъа «умметим» деп лютф этти! Демек ки, Эки Джихан кунеши мени умметликке къабул этти!..»

Иште, хадж ве умре ибадетинде энъ муим хусус, бу юксек дуйгъуларнен о топракъларгъа кетип, Азрети Пейгъамбер -саллаллаху алейхи ве селлем-ни зиярет ве Бейтуллахны таваф этмектир.



Нетидже оларакъ, бутюн ибадетлер киби хадж ве умре ибадетлерининъ де, Аллаһ къатында макъбул олмасы ичюн кямил бир иман ве догъру анълайыш шарттыр. Хадж ве умрени **«мебрур»** оларакъ ерине кетирмек гунахлардан темизленмеге ве Аллаһнынъ ризасыны къазанмагъа весиле оладжакътыр. Ибадетлер, анджакъ Аллаһ Таалаыннынъ разы олгъаны суретте ерине кетирильсе бир нетидже берирлер.

Бу манада шейх Шибли хадж эткен бирине, къальбий джеэatine ишарет этип, шу сёзлерни сёйлеп, бутюн хадж ёлджулары ичюн чокъ ибретли бир насиат бермекте:

«Хаджгъа ниет этмекнен, ишлеген гунахларынъа теѵбе этип догъру ёлгъа кельмеген олсанъ, акъыкъатта ниет эттинъ сайылмаз.

Ихрам ичюн урбанъы чыкъаргъанда эр гунахны устюнъден ташламасанъ, акъыкъатта урбаны чыкъардынъ сайылмаз.



Хадж ичюн гъусул эткенде, бу темизлик, сендеки маневий кирлерни ве къальбий хасталыкъларны темизлемеген олса, акъикъатта темизленген сайылмазсынъ.

Харем-и Шерифке киргенде бутюн харамларны ве Аллаһтан узакълаштыргъан сѣз ве аркетлерни быракъ-магъа сѣз бермеген олсанъ, керчекте Харемге кирген сайылмазсынъ...

Къурбан сойгъанда, нефиснинъ тюкенмез истеклерини ве озъ ираденъи Аллахнынъ рызасы ичюн къурбан этмесенъ, керчектен къурбан сойдынъ сайылмаз.

Шейтангъа таш аткъанда ичиндеки джаилликни ве весвеселерни де ташиламагъан исенъ, сенде илим ве ирфан пейда олмагъан исе акъикъатта таш аткъан сайылмазсынъ.

Кябени зиярет эткенде сенде иляхий ниметлер арттымы, гонъюлинъ раатлыкъ ве севинч иле толдымы? Чюнки хадис-и шерифте:

«Хаджылар ве умре япкъанлар, Аллахнынъ зияретчилеридир. Зиярет этильген Аллах, зиярет эткен хаджыгъа икрам этмеси, узеринде бир акътыр.» буюрыла. *Сен бу икрамны коръмеген исенъ акъикъатта Кябени зиярет эткен сайылмазсынъ...»*⁴¹

Нетиджеде, шейх Шибли шу иляхий фермангъа дикъкъат чекмеге истей:

«Хаджны ве умрени Аллах ичюн тамам этип ерине кетир!...» (эль-Бакара, 196).



Бутюн гузелликлеринен ерине кетирильген хадждан къайткъанда энъ муим эдиелер о мубарек ерлернинъ гузелликлери ве кунюмизге къадар о гузелликлерни яшап, артларында ибретли ве икметли хатыралар къалдыргъан салих къулларнынъ ахлякълары олмасы керек.

41 Бакъынынъыз Ибн-и Араби, эль-Футухат эль-Меккийе, тах-кик: Осман Яхъя, Кахире, 1986, X, 133-138.



Бу мевзунен алякъалы Пакистанлы алим Мухаммед Икъбаль, бир кунь Мединеден дѣнген хаджыларны зиярет этип, олардан шу суаллерни сорар:

«Медине-и Муневверени зиярет эттинъиз! Мединенинъ маневий базарындан гонъюлинъизни насыл эдиелернен толдурдынъыз? Кетирген маддий эдиелер, такъиелер, тесбихлер, намазлыкълар эскиреджек, соладжакъ ве битеджек. Мединенинъ ич солмагъан, гонъюллерге аят берген, руханий эдиелерини кетирдинъизми?..

Эдиелеринъиз ичинде Азрети Эбу Бекирнинъ сыдкъ ве теслимиети; Азрети Умернинъ адалети; Азрети Османнинъ хаясы ве джумертлиги; Азрети Алининъ ильми ве джихады бармы? Бугунъ бинъ бир изтираплар ичинде чекишкен Ислям дюньясына гонъюлинъизден бир сеадет асры эеджаны берип оладжакъсынъызмы?»

Аллаһ джумлемизге Харамейн-и Шерифейнинъ руханиетинден лайыгъынен файдаланмамызны насип эйлесин! Хассас бир гонъюль иле, эм рухумызнен эм беденимизнен хадж ве умре япмамызны ярдым эйлесин! Япкъан ве япадагъымыз ибадетлеримизни макъбул ве мебрур эйлесин!..

Амин!..



МУНДЕРИДЖЕ

СЁЗ БАШЫ	4
ХАДЖЫ МЕБРУР ВЕ УМРЕ	10
АРАФАТ	20
МУЗДЕЛИФЕ ве КЪУРБАН	23
МИНА ве ШЕЙТАНГЪА ТАШ АТМАКЪ	27
«САФА» ВЕ «МЕРВЕ» ТЁПЕЛЕРИ ВЕ СА'Й	30
КЯБЕ-И МУАЗЗАМА	31
ЭДЖЕЛЬ КЕЛЬМЕДЕН	34
ТЕВЕККУЛЬ ВЕ ТЕСЛИМИЕТ	36
МАКЪБУЛ ВЕ МЕБРУР ХАДЖ ве УМРЕ ИЧЮН	
КЕРЕК ОЛГЪАН МАНЕВИЙ ОЛЬЧЮЛЕР	40
МЕДИНЕ-И МУНЕВВЕРЕ ЗИЯРЕТИ	61



